

四庫全書

集部

欽定四庫全書

柴陽外史集卷九十六

七十六

詳校官編修臣翟槐

中書臣劉源溥覆勘

總校官降調編修臣倉聖脉

校對官典簿臣郭祚熾

謄錄監生臣徐葆

欽定四庫全書

榮陽外史集卷九十六

明 鄭真 撰

七言古詩

日食詩

至正二十一年四月朔

辛丑四月朔日有食之既氛祲烟雲相盪摩天地山川
忽蒙翳省垣大臣咸令傳從官車馬成紛然正笏我冠
向玉闕辨香百拜哀籲天嗇夫奔馳庶人走叫嘯謳呼

亦良久路途錯莫若半夜仰見明星大於斗城中編戶
百萬家喧闐金鼓紛相撾何物妖蟲肆吞嚙奮戈我欲
凌雲霞人言七政失躔度厯家推演錯昏暮清臺路阻
兵革深萬里不聞傳救護須臾爭訝紅光還將相公侯
開笑顏羲和重整六龍轡夕陽倒景明西山我年三十
誠罕見憂國憂家心戀戀九重神聖正當陽天象何為
召斯變舉頭問天天不言人事祇今殊可憐聖筆昭然
示訓戒春秋二百四十年

贈邵景南

甘棠子孫冰雪姿詞苑織就雲錦機出門一笑天萬里
翩然直欲登丹梯元戎開藩控瀛海賓幙紅蓮雲藹藹
羅緜帳裏承謀謨匹馬山川眩光采三年書考達皇都
緩花鳳詔承恩除作官何如賦歸去春風杜宇聲愁予
東陵山中瓜早熟翠柳黃花艷華屋良田穰稔樂年豐
石蟹霜橙薦醺醖案頭一卷銅人經夜窻坐對燈影青
小童侍立不肯去心機脈脈通神靈手拈金針三寸許

八法陰陽分處所候氣豈知天日昏夢裏人聽豎兒語
回生起死不踰時坐令壽域春熙熙美譽流傳滿江海
聲歌錯落鳴珠璣我生三十空潦倒庭下秋深書帶草
先子從遊今幾人青眼何由長見好

節婦詩

滄海無情波浪急萬里胡為遠行役北風高高望不歸
駕鳳帷深淚雙滴百年甘作未亡人花香草色空復春
容顏慘淡廢膏沐粧臺明鏡荒浮塵孤燈夜長耿不寐

皓月當空霜滿地
矯首滄溟愁奈何
化身安得如精衛

送張郎中

仙人高住天台山
琅玕苔草怡春顏
翩然賣藥向城市
雲裾五彩鳴瑤環
曉起蒼茫天萬里
寒盃傾泥上池水
青眼逢人一笑開
寧使唇亡露牙齒
十年江海鳴鉦鼙
羣黎慘淡愁瘡痍
神功安用施刀圭
坐令壽域春熙熙
八月中秋日宿鄭
文中家是夜月食
隨班行禮次
日玩月慨然有懷
作古詩一首

團團一輪月飛上黃金闕空齋兀坐悄無言出門一笑
天地白銀河耿耿蟾宮秋金波穆穆凝不流安得清風
生兩腋奮身直上青雲遊我家本在東海住三島神仙
隔烟霧年年八月看月明廣寒指點無多路去年作客
向錢塘翰墨鼓勇登文場嫦娥折贈一枝桂霏霏滿袖
攜天香郡府工歌聽革鹿春日計偕登上國翩然捧檄
濠梁來苜蓿盤空照晴旭淒涼逆旅逢今宵何用沽酒
傾金甌故鄉遠隔二千里眼空碧落心飄飄閨中夜涼

珠露滴兩兔同向樓頭立雲鬟玉臂思依依舐犢恩慈
怪違膝人生離合非偶然紛紛萬事俱由天古云千里
同嬋娟莫道月圓人未圓

瀛州夜宴圖

十八學士登瀛仙衣冠濟濟開樽筵銀燭高燒照長夜
金爐香爇沈檀煙社稷元勲屬房杜忠孝百年論肺腑
乾坤醉裏暗經綸盛世風雲際真主玉京天上非人間
瀛洲可望不可攀河漢秋高月華滿清風雜遝鳴瑤環

龍鳳雄姿天日表策府宏開朝覲早宴娛不敢負君恩
周詩正儼歌天保

和李推官燈夕短歌

玉兔飛昇東海上六鼇駕山壓晴浪春風陸地金蓮花
萬里虹橋跨空曠都城蕭蕭聞馬鳴喧闐鼉鼓轟雷聲
雲中宸遊隔人世霓裳一曲歌隆平人言三萬六千日
百歲歡娛祇今夕烹羊烹魚割素鱗金叵羅深蟻醪碧
琉璃隔幔無纖塵鴛鴦繡幕圍青春金步輕移翠羅襪

絳桃暗滴胭脂唇，老夫門前清似水。
文獻空令嗟宋杞，沙糖米果薦時新。
望鄉欲灑江河淚，瓊臺仙人今有無。
丹山洞天杳蓬壺，採藥歸來何可得。
長嘯一聲天地白。

再詠看芙蓉答沈文舉

淮海秋高宸闕下，客袖飄蕭怯涼雨。
翩然步向庭階看，一笑芙蓉紅半吐。
竭來濠梁今五年，繁華每惜青春前。
莊周臺東芳草綠，遶床化蝶成孤眠。
先生近入黌宮住，佩玉花還喜相遇。
秋色於人亦有情，把酒何辭斜日暮。

斯文萬代肺腑親
食前豈必羅八珍
集裳騷客楚天遠
悠悠江水空愁人
錦城慨想當年事
富貴寧為身後計
笑談歷歷襟懷開
會聚風流那復易
鳳城北風天早寒
物華戀戀良已難
拒霜須令慰晚節
肯容霜後愁枯乾

題梅花圖

我昔達蓬山下住
遠屋梅花千萬樹
瀛洲仙子日相招
百摺衣裙翻縞素
近年為客淮上山
老來霜雪憐形顏
要與花神同一笑
重重巖壑勞躋攀
疎枝冷蕊孤簷下

妙手憑君寫圖畫筆法宛如楊補之笑向樽前索高價
山中佳人白玉肌歲寒問我何當歸要把長琴作三弄
夢裏魂隨雙鶴飛

題觀泉圖

我家四明山谷間清溪碧澗流潺潺石床側目試一聽
恍如仙子鳴瑤環山中夜來新雨足更上重巒看晴瀑
銀河千尺欲飛翻萬鼓雷鳴盪坤軸汪然下注川瀆深
清光一鏡明吾心洗淨塵氛百千斛多情便欲投吾簪

歲月如流吁莫駐飄飄萍泛淮山住興來濯足歌滄浪
白雲茫渺知何處君不見謫仙文章錦繡胸飛流愛看
香爐峯脫靴捧硯不復顧便欲此地巢雲松又不見賀
監黃冠罷朝謁扁舟歸卧鏡湖月十洲三島認為家八
極形神縱超越人生適意非有年老來祇合依林泉客
底清秋見圖畫西風夢遶蓬壺天

題昭仁寺碑

右昭仁寺碑在今幽州宜祿鎮唐師及薛舉戰

地也碑為陣亡士薦福而作世以為虞永興公
書宋元豐紹聖諸君子題識刻於碑陰若歐陽
公取其字法之精而不定為何人所書其餘但
紀觀碑歲月謂為世南少年書者河南張威甫
也以予觀之此碑視廟堂碑筆鋒為露而運意
畧同至於辭語亦有相類者亦一時士大夫習
氣然耶越章立可自陝右入覲用以為貺既裝
潢成什撫其指意系長歌於後云

隋家天子普六茹五兒一氣誇肩祚噬臍追悔廢立乖
忍死空慚獨孤誤大業改號朝新君北南樂土無驚塵
錦帆樓船駕河汴瓊花看遍江都春春夢繁華眼前別
縱意淫奢寧改轍亂離四海金鐵鳴殺人如麻川流血
咸陽不見翠華歸獨夫剗刃誰其悲寰宇皇皇望
真主秋風晉水神龍飛秦王上將天日表草昧羣雄如
電掃鎖枷械鈕俘累累獻凱歸來京闕曉最哉小醜據
幽岐奉將天討森熊貔兩軍一戰勝負決倒戈棄甲愁

瘡痍陣前駢首就誅戮百里僵尸京觀築驚燐明滅艷
青紅長夜冥冥聽鬼哭貞觀年來歌太平恩波直欲流
泉扃丹碧樓臺五雲起金身寶座聯珠纓吁嗟死者焉
可作冥福全資大皇覺茫茫苦海渡慈航淨土西天歸
極樂貝葉翻經白馬馱神人現相嚴撝訶法師上奏帝
顏悅傾心事佛真如何龜趺螭首宮碑樹諫議文章重
回護書丹彷彿虞永興獨怪當時名弗署銀鈎鐵畫覩
斯文摩空鼇背愁斜矐片言誅意凜斧鉞遐思渺渺凌

秋雲自古明王嚴放伐湯武弔民寧嗜殺往事悠悠且
莫論要與書家論波磔

題山水圖

我家四明東海上萬里空青高疊嶂雲霞變幻見天機
誰把丹青寫形狀三神蓬島杳茫中佳期往往來相從
玉佩玲瓏散寥廓鳳簫龍笛鳴春風試與臨流彈綠綺
淨洗平生塵俗耳曲終袖出書一編妙訣人間誇不死
十年為客向長淮荆山塗山屏展開帝鄉湯沐視豐沛

仰睇翠華天上來
甲第樓臺若雲起
富貴煌煌耀金紫
憑誰共賦考槃阿
布襪青鞋丘壑底
童君高住五老峯
卧看瀑布懸晴空
扁舟一葉獨歸去
欲招李白巢雲松
笑我天涯空落魄
已覺丹砂負然諾
尺書渺渺附玄鴻
為向山中問猿鶴

洪武癸亥九月二日與府學賴先生登宋相王欽
若墓既歸作長短歌一首以示

峩峩獨山南
蕭蕭白楊樹
石竈呀然如水深
云是宋相

王公欽若墓相君建事真宗朝千載雲龍誇際遇平生
賜百結胡然飽奸妬寇公社稷勲謬指為狐注西戎南
牧正紛爭澶淵雪恥當用兵逆探上意縱談說天書封
禪夸太平大梁都城千騎出來向西宮祠太乙肆令立
教逞虛無棟宇煌煌耀丹碧吁嗟匡國無良圖九死豈
足湔餘辜君恩勅葬紀勲績斷碑扛去空龜趺三百年
來子孫絕翁仲無言遭發掘玉魚金椀出人間傷心忍
作狐兔穴石為羊虎卧蒼苔斧鑿巉巖留半折春深誰

復酌寒漿杜宇斜陽恨流血老翁耕種攜鉏來為言過
者休悲哀滄海桑田今幾度金谷銅駝安在哉君不聞
輦洛山陵一杯土渡江南來荒草莽攢宮古木常冬青
越客扳號淚如雨

墓碑夏英公撰予來時尚可誦今不復存矣

題雲山圖

客行過淮甸示我雲山圖雲山彷彿異人世恍如過海
登蓬壺芙蓉幻出青天表蒼狗白衣隨縹緲層巒疊嶽

深復深人家半出青林杪是時村南春雨多瀑流萬丈
如懸河巖頭花開爛如錦幽棲奈汝山翁何山上長松
山下屋卧榻氤氲清夢熟雲深天地兩茫茫遙聽林叢
啼布穀山田磽确隨卑高及時耕稼呼兒曹西成釀秫
作春酒太平擊壤歌唐堯我家四明巖谷底赤城天姥
猶尺咫興來欲訪安期生指叱煙雲平地起十年來作
淮山遊濠梁渡口呼莊周八公命駕屢相顧瓊瑤玉佩
凌清秋聞君久住咸陽陌走遍終南歷商號都將形勝

屬畫師攜向鄭城江上宅
山中西風吹桂枝白鶴叫嘯
玄猿悲還君畫圖三嘆息
歲寒問我何當歸

同郡吳道延氏官遊長安以事過濠梁求予雲山圖
詩用述鄙懷後道延入覲京師出示此圖乃知為其
母而作讀諸公贊咏有泚其頽矣信手書一絕而前
詩不忍棄也復綴諸後云

題曲江餞別圖

昔在唐隆帝業仙李盤根誇奕葉曲江形勝冠名都

一鏡光涵浪波帖香花節候春日低樓船載妓如城圍
公子千金買歌笑酒酣拔劍魚龍飛太平無事息爭戰
科場妙中穿楊箭金榜題名鴈塔高同向江頭赴秋宴
是時南苑集旗旌君臣豈樂接鐫京霓裳羽衣教法曲
千門萬戶皆新聲鼓輦動地漁陽變舊日繁華都不見
白頭愁殺杜陵翁春日潛行淚如霰桑田悠悠知幾年
大明赫日當中天方面專城分閫寄紅蓮幕下羅羣賢
吳君慣作都司客嘯歌曾醉長安陌春深修禊濯冠纓

愛看江心明月白青雲咫尺步亭衢鵬搏萬里真雄圖
羣公宴餞集冠蓋酒酣擊碎青珊瑚笑我淮南兩相遇
矯首咸陽問親故曲江願得與同遊悵望西山愁日暮

題青山白雲圖係廣信府同知方公所藏

海國千山列屏嶂萬疊浮雲滾濤浪雲來雲去本無心
蒼狗白衣幻形狀長松密竹翠糝糊蕭蕭清籟真笙竽
人行問路失南北恍惚越海登蓬壺山中伊誰結茅屋
考槃獨樂歌在谷酒酣笑倚兩崖高萬鼓雷鳴瀉銀瀑

琅玕結實瑤草青服食自可通神靈玄猿白鶴成伴侶
朝霏夕靄秋冥冥我家四明山水窟十載長淮空竊祿
生來懶性合幽棲看山看雲嗟不足近來船過嚴陵灘
樓臺縹緲虛無間環佩玲瓏出林表儼然天上非塵寰
黃堂仙人政多暇彷彿鄉關閱圖書要覓商公與趙公
妙筆千金閱高價

送陳大舍

藕堂古云耕戰地孤塔重重碧雲際山川鍾秀產英豪

將相公侯誇富貴而翁親際六龍飛胸中韜畧皆神機
當年介冑陣前決凱歌夜踏明月歸向來介冑雲南去
花角羣蠻爭款附聖恩建節表殊功萬竈貔貅旗鼓樹
太平鯨島無浪波吳山滿眼浮青螺佳兒省覲拜庭下
轅門衍樂當如何綵舞翩跹五雲起蒼玉盃深浮綠蟻
雅歌我欲賦南陔海內同稱陳孝子

題胡仲厚先生山水圖

范寬筆法誇神妙安定胡君契深要向來贈我山居圖

恍入蓬萊循海嶠祇今遠作靈峯遊層崖疊嶽涵清秋
浮嵐散盡雨新霽萬丈倒掛銀河流金碧樓臺半天倚
下視人間深澗底南扉北崦近相望蒼樹重重碧雲起
危橋兩兩如垂虹跨驢策杖紛相從林深誰憐採樵者
雙肩軋軋懸崖重浮世光陰去如電往者憂勞來者倦
異鄉相見祇須臾禮俗人情空戀戀十洲三島滄溟天
夢回夜半聞啼鵲故園松菊幸無恙揮毫欲賦歸來篇
寄語當時老丘壑百歲襟期宛如昨安期羨門如可招

便與山中侶猿鶴

胡仲厚先生畫林塘讀書圖

按宋宣和畫譜河陽郭熙為御畫院藝學山水
寒林宗李成法得雲烟出沒峯巒隱顯之態布
置筆法獨步一時後學莫及也吾鄉胡先生仲
厚為吾兒東昇作林塘讀書圖形勝宛轉識者
謂其有千古無窮之趣使郭河陽見之寧不以
伯仲推之耶因題詩其上以寄意云

我家住近荆公臺天光一鑑林塘開面面青山如圖畫
烟雲捲盡空翠來岸頭種花還種竹風日芳菲艷紅綠
珠簾捲起倚危欄生意欣欣快心目錦魚羣躍雙鷗飛
俯仰上下皆天機世外游塵飛不到石牀但聽聲唔呬
客來試問滎陽派通德門前長書帶青春滿架鄴侯書
觚積雲飛蠶與蠶衣冠想像南渡時瓊枝玉樹相光輝
百年祖考見餘慶佩衿濟濟越庭幃笑我平生探簡牘
伯仲翩翩期嗣續寒波青影落孤燈風雨瀟瀟夜深讀

科名作教淮海壘升除又上江西船玉溪水雪大於斗
廣文座冷憐無氈脊令原頭聲更苦手足摧殘愁肺腑
不才幸有兩男兒玉臂雲鬟吟杜甫熊兒欲遣尋歸途
驥子不來將奚如吁嗟文獻猶一線莫令先澤俱荒蕪
田園欲歸看圖畫胡公胡公神變化何時共坐秋水深
詩酒襟懷悅情話

送董理問復職

鎮州古稱成德軍包括燕趙連并汾山川間氣產豪傑

風雲際會成殊勲昔在完顏貞祐日汴蔡南北權駐蹕
韓難河上氣如虹還塞爭傳真世出橫戈鐵騎歌來來
兩河掃蕩氛塵開上將同推藁城董盡忠竭節誠雄哉
有子承家諡忠獻渡江南來經百戰幼孤入覲版圖歸
凱奏彤弓賜周宴文階武秩誇雙全滿門金紫何蟬聯
百餘年來天運改名家喬木青雲還公子翩翩富經學
河漢天高翔薦鶚除官遠向閩海堧玉雪襟懷倚寥廓
天顏入覲昭重瞳歸來獨跨連錢驄笑我費宮欣一見

論談往事來清風南州獄訟計千百兩造情由須別白
歲時有暇拜先祠好向庭階樹松柏

又

通印子魚珍味別石首螭房同饌列南州海錯不論錢
公平歸來雲日邊閩因家家喚郎罷雙引旌旗馬前迓
荔子丹紅榕樹陰薰風灑灑冰雪襟藩閩清平民訟少
鸚鵡呼名清夢曉碧甯頻勸阿蠻歌問公此樂當如何

用王理問中秋韻

玉盤捧出水天暮霜雪暝然江海路官船面面啟篷窓
撐入溪瀧最深處梯空我欲招素娥廣寒孤眠奈愁何
吳剛斫桂頗驚恐仰天却愛清光多四海一家異風土
王事不辭行役苦桁楊讞決鏡同明檠戟森嚴趨閫府
盛時樂育如成康仁恩叶律歌清揚桴鼓不驚刁斗靜
燕樂何愁秋夜長鮫川仙人富詞藻詩酒情娛散襟抱
舊時曾上虎蹲山笙簫曲奏人間好月光如晝夜如年
天涯廓落心茫然願騎鸞鶴竟歸去罡風浩炁天清寒

豈不見蓬萊瀛洲東海堦瓊琚玉佩多飛仙

用前人青山白雲韻

危岑削懸崖長林隱平陸蕭蕭曲徑遶龍蛇千尺飛流
深壑谷太虛元氣涵鴻濛日光倒射金芙蓉白衣蒼狗
時變幻舉頭疑與天門通山中羽人面曾識枕清流兮
漱白石飛行萬里祇須臾誰道蓬萊滄海隔手招玄鶴
騎白騾炯炯雙瞳秋水波白日神游呼不醒洞門鎖鑰
捫烟蘿百歲光陰祇瞬息歷歷雲山長記憶畫圖移來

方寸間試向林泉問遺迹

滎陽外史集卷九十六

欽定四庫全書

榮陽外史集卷九十七

明 鄭真 撰

同年錄

十一月二十一日明州府以諸進士計偕京師設
燕席歌鹿鳴而勸駕是日禮樂備具正位南向者
上賓衛閫指揮僉事馮公某張公某坐西東向者
漕省宣使湯公某沈公某省委官某衛鎮撫某訓

導胡先生季弘趙先生斯咸為之主者郡同知劉
公某通判王公某鄉貢進士則鄭真郭可學樊餘
慶黃夢熊顧厖吳振王廷直王用吉孫原仲吳倫
陳希貢汪義方何操陳仲賢共十有四人由阼階
升列坐以齒以病弗與者汪璣罷宴而歸於是真
口占絕句詩十首以貽同志云

折桂應須到廣寒
滿天清露曉溥溥
吾儕當為科名重
莫作人間朽物看

魯史春秋感獲麟淒涼篋笥久生塵自知投老成無用
空作鄉闈第一人

十年剪燭向南窓敢向詞壇築受降今日藩侯親勸駕
愛看公府肅旂幢

華堂今日綺筵開濟濟衣冠進士來矯首遙瞻天咫尺
五雲紅日滿蓬萊

插花須向少年頭蒼鬢簪花不自羞醉後歸來清夢遠
西風萬里月宮秋

歌工奏罷鹿鳴詩拍拍盃行到手遲三歲賓興朝典重
諸公何以報明時

請得官錢十貫文化工賜與擔頭春長風送上青雲路
同作金門獻頌人

千里南都忝計偕不容投老向茅齋文章即是經綸事
莫道相如祇類俳

三千禮樂擬天人金殿當頭定策勲韋布總成金與紫
好將功業報明君

蕭蕭風雨一編書正擬丹梯上石渠禍福總由天所定
旁人嗤點竟何如

計偕錄

行程日記

昔盧驤作西征記陸游作征蜀記凡山川道路風
土人物遠近同異歷歷備載而其年月時日亦所
不遺後之人有攷焉真忝以鄉貢待選京師足之
所經目之所見耳之所聞畧記其一二至於情思
所不自己者率爾見之詠歌言辭淺陋不足以貽

同志始集以示兒侄名曰計偕錄云

洪武五年十二月二十日明州府命里長張孝禮
詣諸進士家敦勸上道

二十一日早詣府中拜別同知劉某通判王可大
各答拜期望甚至且謂用人之時解元先去可也
遂詣先聖廟下祝辭云云

二十二日出甬東別親友

二十三日別城中親友拜辭府主殿下祝辭云云

因舉玦環乞靈卦辭以蘇武為言有節毛終見漢
君王之句

二十四日告辭城隍廟下見王叔載先生牀頭再
拜涕淚成別且以青雲黃壤之說為贈至於斯文
撰述獎厲期待尤見先輩忠厚之意

二十五日午後登舟夜宿西門

二十六日晚飯將戒行是夜三更泊高橋張循王
祠下王宋紹興中興四將之一高宗為烏珠所逼

航海幸台溫王用隱士劉相如計駐兵高橋開門
迎敵敵至拔寨而去遂為戰功第一慨想舊事成

詩一首

代馬陰山來六飛向南渡北風吹黃沙播蕩滄海暮維
王奮孤忠甲兵號虎駐賢哉劉隱君奇謀吐衷懷青野
危橋橫一戰分勝負捷書上行在玉音多獎諭信史直
筆書昭然勲烈著荒祠河水湄輪栝成朽蠹值茲艱難
時誰能起頽仆我生四十年遺容仰平素計偕京闕遊

中宵宿霜露福祉思寵綏神靈祈惠顧輕舟暫時移躊躇弗能去

二十七日泊舟西渡吳進士始來同舟者郭可學陳希貢黃自強孫原仲陳仲賢僕從共十餘人成律詩一首

輕帆飛去彩雲還沙上人呼貢士船敢謂扶搖搏九萬政須禮樂對三千風生衣袖寒相訝月透篷窓夜不眠矯首皇都春色近奉天門外聽臚傳

後舟王用吉汪義方樊餘慶吳秉彝迺邈同行赭
山風浪洶洶至文亭暮夜待潮成古詩一首

歷歷川途分悠悠歲華晚簡書有程期去去未可返輕
舟沂中流越山青在眼隱君近何如毋煩招折簡

二十八日早到餘姚與諸進士謁考試官劉彥質
先生奉書為質先生長身脩髯年登八十與先教
授為友先生言往歲越守行鄉飲酒禮吾與令先
尊同燕席因問訊孫正父先生暨家兄動靜具湯

延坐論場屋事言閩人孫伯延已在第三名言者
以其在前朝嘗為進士遂以次而改伯延以為當
然謝別而去甚稱其文且謂其靜退次謁王漢章
不值閱堂上校官碑遂登舟晚到通明宿上虞河
上有懷先壠成古詩一首

亭亭西畧山青烏發奇秘岡巒西北來龍虎相拱衛吾
宗今八傳妥靈有餘地先人尤種德文獻承世懿詩書
挿架橫捧誦當弗墜科名誠偶爾何足紹遺志翩然京

闕遊控辭灑清淚森森竹樹深永永泉石閔封殖在後
人顧茲寧勿喟竭來百里餘音容勞夢寐顯親在揚名
不才何得致但願早歸來續嗣貽百世

二十九日除夕過雨既過曹娥同舟皆起家想成
絕句二首是夜宿東關驛飛雪沾面衣為盡濕

風雨舟中過歲除青雲矯首望皇都布袍總是同年者
江上還能送酒無

小兒捧飯祝添年應道爹爹在客船慈孝由來天所念

瀛洲東望思淒然

洪武六年正月初一日早雪飯後行舟暮至越城
下律詩一首

曹娥江上渡元朝瀛海家山望眼遙謾道花旂散綺綠
誰將綠醕醉瓊瑤碧崖影動雲衣濕銀界光浮雪片飄
盛代衣冠朝典重九重神聖仰唐堯

初二日入越城見錢啟予先生遂登舟出西門有
懷舊事成古詩一首晚宿錢清江上

我我越州城古稱勾踐邑風流賀季真鑑湖有遺迹我
行正月初俛仰記疇昔粵惟宋南渡衣冠浩如積穆陵
居側微名映金枝籍吁嗟保長家剪甥定親戚天意叶
人謀大雨遍南隲朝中官客來牲饌羅几席童仆雙立
侍英姿見岐嶷繼宗八沂邸冕旒正宸極大統四十年
基圖固宗祏桓桓史相君旂常書偉績余參適逢辰勲
封隆寵錫世運迭移推江山何歷歷過眼成慷慨清風
送舟急

初三日早過西錢清埧晚宿西陵絕句一首

峩峩雙疊翠雲腰戰伐英雄久寂寥
惟有一錢劉太守
姓名千古揭雲霄

初四日風雨渡江寒氣淒冽至新宮橋宿舊主人
陳店其老嫗言吾家代歇舉人為省元者前有林
溫今有官人至誇為異云

初五日見李云仲葉教諭言杭學諸生入試事遂
造學中見訓導常凌盧三君子及金華進士贖藥

與王生及閻汝賢處送書復到葉國亮監宅送書
見其壺政云云

初六日到省中先謁左司遂引至堂上大叅徐公
命予獨立去諸人尺餘地且言揭曉時有酒相待
但得省元亦可何皆不在耶觀汝年紀最長中亦
在前有司為不愧矣李大叅亦云有福氣白衣卿
相無疑遂命製貢士詩及甘露詩歸成二首見後
云云次見憲僉杜公劉公庭坐啜茶且再論議訓

獎甚至其可為訓戒者有石闕尊父一事後見王
經歷茶欵而歸是夜移宿王通判家

初七日到省房見典吏王修索嚴氏養素軒銘遂
到學中見諸訓導求先人挽詩是夜雪

初八日早雪不出諸進士以詩藁見示遂寫養素
軒銘令張里長送去

初九日雨出薦稿看所刊程文錄考官批語以憑
給據蓋省房紅卷為他人持去故也

初十日雨不出寫所中程文

十一日題王用吉所畫紅梅送房主人王通判

東風有信過瑤臺姑射仙人月下來底事不持冰雪操
也將紅粉暈春腮

是日王通判以趙仲穆馬求題

十二日寫詩贊大叅徐公李公

貢士詩

某等忝以諸生獲與鄉選有司敦勸計偕京師

進拜省垣大臣承獎厲期待甚至敢率諸進士
賦詩各署姓名齋沐上獻用以歌咏朝廷樂育
之盛云

周詩久矣咏菁莪恭覩熙朝進士科蘇子可能忘永叔
馬生終不負常何桂宮名送金書喜草閣功成鐵硯磨
禮重藩垣承勸駕春風不日候鳴珂鄭真

四十相將白髮新忽聞科詔下絲綸萬言策獻須當宁
三載賓興豈乏人折桂已探明月窟看花還待上林春

已知發軔從今日願把丹心答紫宸郭可學

丹鳳銜書下九天名科三載威才賢薇垣日近光華接
棘屋雲開姓字聯鶚薦已應騰仕路鹿鳴還復侈賓筵
讀書敢負平生志更待吹噓到日邊黃夢熊

桂子秋風一榜開傷人還報捷音來敢云鶚薦騰霄漢
空愧鷄衣出草萊喜動薇垣尊上宰光聯奎宿聚羣才
同年笑我多迂腐誰識丹衷徹上台陳希貢

科詔翩翩下綵雲萬方多士賴陶鈞三千禮樂威儀盛

一代文章制作新
兔窟秋攀丹桂月
蟻盃曉宴紫薇春
草茅賤士慙無補
獨有丹心答聖人
孫原仲

泰運天開日月明
棘闈濟濟集羣英
縱橫禮樂三千字
浩蕩風雲九萬程
秋榜鹿鳴承錫宴
春風鴈署儼聯名
不才何有匡時策
千古令人媿賈生
王用吉

九五龍飛帝業新
玉班簪紱盡儒臣
棘闈校藝三千士
桂籍題名四十人
鶚薦書成雲有路
鹿鳴歌罷座生春
奉天門外臚傳日
儼著衣冠拜紫宸
吳倫

盛時有詔舉才賢奎壁輝輝煥八埏上相恩先垂藻鑑
諸公文采燦瑤編鹿鳴革野春聲洽花映宮袍曉色妍
咫尺龍樓承寵渥不才何補聖朝天樊餘慶

聖代新開進士科紛紛俊造欲如何高攀丹桂秋風遠
坐對青燈夜雨多仙仗儼聯鵷立署華筵曾聽鹿鳴歌
五雲門外承恩日佇看珊珊響玉珂

汪義方

天子文明並帝堯棘闈採擇及芻蕘衷私未有涓埃報
寵渥先承雨露饒喜聽鹿鳴來畫省暫隨鶚薦上青霄

書生何有匡時策會聽鳴珂候早朝顧厓

天上煌煌耿璧星賓興有詔待羣英秋登棘院紛雲集
春宴槐庭聽鹿鳴一代詞章成制作百年禮樂屬文明
致君堯舜須賢佐會見蒼生頌太平何操

盛世文明照上台誕頒科詔聚英才上公喜借薇垣重
多士欣逢棘院開寶玉千金諧美價錦機五色詫新裁
計偕已覩皇都近欲頌昇平媿不才吳振

天開文運耿奎先大比賓興總俊良四海還宗周禮樂

百年復覩漢文章雲開畫省先華接春滿金城雨露香
自媿不才無寸補願將忠義答吾皇

王廷直

天開文運耿星奎多士紛紛聚棘闈芸草光浮青竹簡
桂花香染碧雲衣百年正遇風雲會千里還承日月輝
見說上林春似海杏筵笑看錦芳菲

陳仲賢

甘露詩

某等忝以鄉試計偕京師進拜省垣大臣承命
製甘露詩謹率諸進士同賦各署姓名齋沐上

獻用以咏歌朝廷嘉應之盛云

聖皇威德動蒼旻湛湛神漿慶澤新仙掌不須誇漢苑
絲囊何必詫唐人雪脂色瑩瓊盃滑飴蜜香傳寶甕春
想見內朝恩遍及洋洋歌頌藹宸輿鄭真

九重天子正當陽丹禁曾看玉露涼漢史紀年歌有道
唐人祝壽慶無疆詞臣應喜分瓊液尚食還傳進玉觴
盛世太平端有象敢將直筆著禎祥郭可學

聖皇威德動蒼冥兩見鍾山玉露零絕勝金莖擎碧漢

還看寶甕貢瑤廷
九原脈脈融甘醴
雙闕輝輝現景星
盛世禎祥紛莫數
史臣傳載簡編青

黃夢熊

九天甘露降溥溥
應作人間異物看
不羨蠻方來寶甕
絕勝雲表捧銅盤
鵷班已遍瓊杯賜
黼座還傳尚食餐
下士也應沾潤澤
便須擬頌上朝端

陳希貢

聖德明昭日月齊
九天零露玉淋漓
金盤曉色分瓊液
寶甕春香凍石脂
喜見兩年霑惠澤
願均四海洗瘡痍
太平氣象逢今日
自媿無才叶頌詩

孫原仲

聖化流行海宇安禎祥已得兩迴看脂凝仙掌神漿滑
香蒲清盃玉液寒萬里銀河秋湛湛九重丹禁曉溥溥
太平氣象稱歌頌自媿無才瀝寸丹

王用吉

聖皇盛德動蒼穹零露瀼瀼下九重喜看瓊脂凝柏葉
從教金掌濕芙蓉班行寵賜玻璃碗尚食香傳瑪瑙鍾
太史定應書直筆黎民從此樂時雍

吳倫

藹藹瑤天曉色晶紛紛甘露濕珠璣香浮細雪凝來重
味比甘飴分外清正是堯廷來寶甕寧誇漢苑濯金莖

謹身殿下衣冠集想見稱觴賀太平

樊餘慶

聖皇布德被芻蕘天酒淋漓下九霄太史備書青竹簡
侍臣上頌紫宸朝香浮寶甕神漿滑色瑩金盤玉屑饒
泰象昇平先有兆雍熙還復覩唐堯

汪義方

聖皇威德洽華夷甘露嘉祥奏玉墀色炷金盤濃似酒
香傳玉食美如飴景星已見輝雙闕嘉麥還看秀兩歧
行聽謳歌興比屋陶唐政治見今時

顧璜

太平治象格穹蒼兩度神漿見帝鄉尚食捧盃呈沆瀣

詞臣執筆紀禎祥松枝柏葉同今古仙掌絲囊陋漢唐
指日擬看麟鳳至萬方歌頌樂時康

何棟

聖德無為被八埏紛紛祥露下瑤天寒香上進瓊盃
曉氣輕浮玉琲圓共使羣生沾潤澤從知萬里格穹玄
太平有象書青史何羨前朝頌醴泉

吳振

玉露漙空凍雪脂聖皇道德燦光輝日邊湛湛秋初爽
雲表紛紛曉未晞想見瓊盃分館閣須知玉食奉宮闈
書生目覩昇平象賸有詩篇上紫薇

王廷直

聖皇盛德似唐堯甘露瀼瀼下九霄寶甕還多蠻海嶠
玉杯曾進紫宸朝應知上帝湛恩沛解使吾民渴病消
曉日鵷行承寵賜詞臣執筆擬歌謠

陳仲賢

十三日雨不止跋馬圖與王通判

十四日陰雨不出張里長自省中送解據來就以
家書與之晚於街上觀燈值雨而歸

十五日入學拜先聖值僉憲觀射遂與未坐與三
訓導為別得先君挽詩冊而歸午後於用達胡惟

中來訪晚與諸進士周旋街上遠近高下燈燭熒
煌光明如畫口占一詩為之悵然

沙糖米果薦時新今夜吾家少一人客路錢塘相望遠
小兒燈下問慈親

十六日到省房催船因到吳山城隍廟暨梓潼祠
其籤竹係咸淳年造因問二籤先凶後吉有花錦
到平川之句門外宋碑一通載賈太傅似道捨田
事大概言神舊祠在蜀中自蜀破後士大夫順流

東下者於行在吳山立祠開慶中太傅督師江上
時向士璧駐夷陵北師南伐太傅命士璧援忠南
士璧乞靈於神神托巫言看取車攻七月詩士璧
曰車攻非七月詩也神言後當有驗既而士璧斷
橋戰勝憲宗晏駕太傅班師穆陵書車攻以賜正
七月也以為靈驗之碑蓋高尚書斯得撰陳文龍
常楫書篆其序事措辭俱有法度蓋宋季文章之
傑者碑作於咸熙九年時北師已在江上邊報日

聞而士大夫猶從容文字若平居無事者可為一
嘒至於終篇大致指先元為寇為敵然而歸附百
年過而讀者固多而無有碎毀之者其亦未嘗有
見者耶

是午與原仲至江頭訪王子遠飲酒麪且附家書
晚與諸進士周旋街上口占一詩

星河移下九天來
朶朶金蓮遍地開
風外玉環聲雜遝
定應仙子降瑤臺

十七日雨與諸進士買舟出北關門登岸過楊左
丞營慨然有懷古詩一首

長營何盤盤云是苗徭洞悲哉楊將軍紛紛甲兵弄劍
粧白玉鐔馬鞍青絲鞵短袴百褶裙前鋒誇勇衆戰功
稱上多胡為恣貪縱人心失所歸地險焉足用禍機暗
中發噍然強敵關徬徨欲何之宛若蟲鼠甕尚能不辱
身一死誠足慟伯氣久消歇頽基荒草葑我行寒雨中
塵沙深沒鞵過眼閱盛衰春風吹過夢

十八日以不得船釘靴步入省中往返三十餘里
勞倦之甚

十九日晴復自北關門入省中索船帖晚宿館伴
余安道家

二十日得順帶船帖以軍粧船遲緩不及遂議買
舟

二十一日買舟宿德勝門外是夜雨

步出北關門風雲壯行色草枯荒壘深將軍有遺迹十

年兵甲餘人烟渺蕭颯際今明盛時車書成混一儒科
急需賢山川記遊歷買舟問前途風波如矢激

二十二日飯後戒行

二十三日舟行崇德界中吳人多以船為家成詩
一首

吳船輕輕泊淺沙春風水上長為家吳娘少女雙髻丫
浮生不解蠶與麻隔岸兒男十餘歲慣看波濤作平地
船頭日日兩相看船上招呼作夫壻夫壻不比輕薄兒

風雲千里長相隨明日掛帆向京口擬向江樓共沽酒
二十四日過崇德縣成律詩一首

扶桑日出曉水消滄海東州望眼遙孤堞雲低開百室
夾河水滿接三橋樽筵歌舞繁華歇兵甲紛爭俊傑銷
老嫗舟中作吳語官錢四百荷相饒

二十五日雨中入嘉興城學中見鮑仲亨馬新仲
二先生馬先生贈羊背皮官酒二瓶與諸進士共
享作古詩三首

嘉禾古名郡春秋稱槁李遐哉烏喙徒紛紛兵燹起薪
胆良苦心足洗會稽恥勝負勢不常聖筆昭麟史功成
不自安安能謹終始扁舟五湖遊千古高范蠡

曉憩北麗門高下望阡陌曩聞嘉禾生禎祥照圖牒煌
煌宋阜陵名藩記潛躍懷哉崔府君神靈何赫赫寒雨
從天來鳥鳴泥滑滑往事且勿言吁嗟遠行客

恭惟陸宣公異才鍾間氣浩蕩風雲期君臣魚水契奏
牘千萬言正色抗廷陸風流今尚存像貌嚴享祭我欲

往拜之風波恐留滯絲綸五色文千古有餘意

二十六日過太湖七十二祠入旁出湖至蘇州入
城過鶴山書院因訪魏俊民彥莊先生書院已廢
惟門樓巋然獨存其文靖諸孫四壁蕭然所見彥
莊族兄好古畧言書院興廢之由問虞學士所製
碑則斷仆為戍士擡去已久轉過一巷造彥莊家
不值過三讓至德廟迫暮不入為之悵然出閭門
失船所在遂訪本地鎮撫借宿僧舍

二十七日登舟而行賦懷古一首

闔廬城上姑蘇臺東風三月春
花開華車紅幟輪轍動
滿街人看西施來傾國傾城好
顏面笙管酣歌情戀戀
卧薪嘗胆良苦心誰道強鄰有
勾踐三千鐵甲聲如雷
重重樓閣飛塵灰黃池霸氣盡
銷歇甬東乞死空徘徊
往事悠悠竟千古豪傑紛爭何
足數假王來卧齊雲樓
傲睨凶強卒為虜祇今疆宇歸
聖明鼓桴息警風煙清
上國輸肝天不遠東風一棹扁
舟輕吳中山川看春色

美人不見空相憶尚憐三讓有遺風江上黎民歌至德
二十八日早到無錫縣

二十九日晴至常州入城出西門登舟

吳船團團如屋裏數尺蘆帆挂烟水船頭烏鵲聲喳喳
紛紛行客青天涯天涯悵望知何處玉京咫尺無多路
天風雜佩鳴瓊瑤雲中仙子紛相招滄海瀛洲重回首
鶯燕春風自花柳夜深千里夢還家山妻抱子愁窓紗
三十日舟行常州界是日風水如駛行百餘里成

海隄一首蓋臨行孔昭兄所命也云云

二月初一日陰飯後到丁閣既登岸以王僕失物
轉去船上尋索遂獨看行李王僕既至而諸進士
已前行矣既而王僕辭以擔重予分背席包行四
五里許得見諸人同稅車子各載一箱至於鄉三
十餘里所過無高山而平岡遠繞山田野水參錯
掩映夾路新松長可五六尺許遠近高下蒼翠蓊
然時日已暮人蹤希絕四望無際遂至埤頭尋宿

農家夜半風雨大作愁思不寐遂成古詩

舍舟問前途長天正寥廓平岡周四圍隱隱若城郭山
田隨地成野水浮空濶我行隨轍迹犬牙路參錯僕夫
已云痛顧步前復却買車載行李崎嶇經澗壑前登松
林重飛來雙鸛鶴人蹤何悄然同行嘆蕭索黃昏扣人
門鋪茅暫棲泊夜深寒夢醒愁聽風雨惡

初二日雨不行

初三日自於鄉買舟主僕二人用三百六十文蓋

自德勝埧起程用千餘文而行囊已云罄矣

初四日至京師小南門登岸買飯而食店中暫泊行李夜宿羅信言官舍與樓知縣漢原同宿

初五日移宿陳知事叔明家遂造部中

初六日雪中到部投供狀詹呂二尚書公畧問所業

初七日雪中到部見鄉人王敬中蔣子杰及陳廷學夜宿信言所寓時樓漢原將官肇慶高要知縣

以詩畱別信言遂用韻以贈

碧雲卧蓬島共說觀光好偶然遇計偕悠悠即長道東
風春及時望鄉渺天涯故人幸相見足慰千里思樓公
世家子文獻誰與比炯炯歲寒心冰壺貯秋水年華四
十霜作縣游南方輕車度梅嶺山川鬱蒼蒼流光若飛
梭此別當如何願言樹聲教江漢傳謳歌

初八日到部中有旨以舉人年少者於監學培養
山西十五人湘江十九人鄉中孫原仲何操吳振

王廷直汪義方吳倫陳仲賢皆在其列見奉化知縣洪某因附家書

初十日入吏部見馬易之子缺

及林原公恭

十一日入吏部值雪而歸

十二日大雪筆硯成凍送諸進士入學見王彥南

夏景文二先生彥貞言孔昭所索文字候成寄去

十三日雪後寒甚郭可學陳希貢黃自強來就歇

十四日雪霰交作寒氣益甚

十五日為人上天師求錄其詞曰

彩雲深處鶴翩翩
星弁霞裾擁漢仙
中使承宣催玉佩
禮官奉旨秩瓊筵
篆爐香爇三天啟
金劍光開七宿懸
下士皈依今已久
願求寶籙養殘年

十六日雪中杜元亮來得家書

十七日入吏部再點過

十八日夏尚忠來得家書李云仲言別因附家書

題趙貴伯扇面一首

千里京華客青山入夢來抱琴歸去早流水認天台

十九日到國子監宿羅先生所寓

二十日鄉中諸友入試吏部詩題甘棠首章書極
之數言是訓是行以近天子之光至為天下王易
飛龍在天利見大人諸友文皆可讀

二十一日陰晴題梅一首貽陳知事造都督府因
見王伯恭遂入吏部

山人歲暮雪中歸折得春紅第一枝莫作尋常桃杏看

調羹正在太平時

二十二日過神策衛因觀虎豹豺狼孔雀之屬

二十三日入吏部與徐尚裨葉有常羅振初郭可
學游蔣山登寶公塔問一身大槩得八十籤云宿
霧浮雲蔽日明迴風掃蕩迴然清共欣險難今消
散事滅安生福可膺寺僧以為吉卦塔係匡正宗
所造周迴深邃清氣逼人大士金銅為之被千佛
繡衣登其塔者生敬想次入崇禧寺見西甬所謂

帝師者下山駐二碑亭有李陽冰石篆宋孝宗御書張魏公撰寶公行業虞黃二公碑文二通其外一碑亭有趙世延虞伯生所著皆在戴碧珠在樂銑事然求之鐘上則無有宣歲月既深為銅花所蝕耶

二十四日與朱德常相遇德常以公事暫寓西華門因過其處

二十五日定海某主簿行附家書午後與夏尚忠

范敬中遊天界寺周觀畫壁輝耀遂造國學而歸

二十六日

二十七日鄉人陳思禮等入國學舉人至堂上點

過

二十八日尋史恒可聞已歸為之悵然遂造朝天

宮登治亭山間飛龍亭則毀棄久矣

二十九日夜宿舜言處

三十日

三月初一日憶表兄蔣升忠忌日為之泣然

初二日戎盟魯許和來知崔先生動靜喜甚

初三日與福建省元陳珪間坐言本省春秋題兩
王所兩公如楚其破題云覲王而霸業盛事夷而
霸業衰珪係前朝淞江舉人與周佑同榜舊名元
珪

初四日遇江西省元夏元震治春秋年五十六歲
其言試題兩虎牢破云春秋予霸主之服貳始以

責一國之失地利而終罪諸侯之素王制其闕名
饒季讓云春秋罪諸侯之不能保其險而責諸侯
之據其險其十八名劉季鵬年最少係公是先生
子孫破云諸侯之失地固春秋之所譏霸主之據
險亦春秋之所責其十一名陳賢云在已者其險
不當失在人者其地不當專

初五日同鄉進士顧厓除給事中因見鄉人契舊
自濠梁來者劉子中宗紀道善原之章起潛

初六日見卜元吉

初七日鄉人試吏部春秋題于泚翟泉詩千祿百福書肇十有二州易八卦成列章

初八日送編修張思魯廬陵張思魯寓居河南以進士計偕京師授翰林國史編修官未及三月奉旨歸廬陵上冢賦詩贈別期後會云

玉堂新賜上方衣江上扁舟許賦歸想見芳筵成孝享
青山宰木炷春暉

初九日見宋景濂贊善先生晚遇答祿御史知屠
養浩動靜泛論馬易之及詩文遂宿王伯恭家草
屋二間卮酒留歎侵草一飯而去

初十日王僕病腹夜半呻吟不已

十一日

十二日入禮部見宋先生是日羅振初除濟南肥
城縣主簿王振辰除平原縣主簿

十三至十八日以來但為王僕所苦

十九日早訪鄉諸糧長與韓惟善郡公同宿

二十日

二十一日

二十二日

二十三日禮部謁貝廷仁諸先生不值


二十四日雨不出

二十五日到國學見趙本初錢子予貝廷仁諸助

教

二十六日先君忌日以不得在家與祭涕泣嗚咽
飯後到部聞有中都臨淮教官之除益重遠想

二十七日到館聞南家某人死遼東妻守寡而貧
云



柴陽外史集卷九十七

欽定四庫全書

集部

榮陽外史集卷

九十八至一百

詳校官編修

臣程槐

中書

臣劉源溥覆勘

總校官降調編修

臣倉聖脉

校對官典簿

臣郭祚熾

謄錄監生

臣徐豫

欽定四庫全書

榮陽外史集卷九十八

明 鄭真 撰

濠梁錄

三月二十六日吏部尚書詹公奉旨注擬淞江進士八人為中立府所屬教官蓋以諸進士辭以不能居州縣之職故優待之且以濠梁為國家興王之地教育之職必慎選進士為之者欲其養成人

才也於是中立府臨淮縣儒學教諭鄭真首授是
選洪基定遠縣教諭胡惟中五河教諭王景彰懷
遠教諭郭可學宿州靈璧縣教諭陳希貢徐州蕭
縣教諭既准所擬四月初八日於指揮司請文引
初九日早衣冠入吏部謝別晚搬行李於王伯恭
家候可學希貢同行伯恭館穀三日復於信言處
就宿十二日早與信言為別飯後與希貢出北門
伯恭令僕送行李至龍江午後渡江舟中口占一

首

扁舟同過大江來
浩浩天風潑浪開
矯首濠梁三百里
皋比掌教媿無才

既渡江至浦口巡檢司批引遇巡檢俞氏係同鄉
奉化塔山人極蒙溫存出示嫠人姓某自牧齋記
求為銘詩是夕風雨襲人景色淒然十三日早雨
霽議買車以價穹不就予為僕人分背行包之輕
者遂行希貢輕健追之不及道逢鄉人畢子方王

用和等至五十里宿歇十四日行滁州界中作古
詩二首

長淮古形勝山川何遠哉凌晨駕言邁浩浩風雲開十
年兵燹餘田廬盡蒿萊居人事煙火相逢絕嫌猜俘囚
亦何者纍纍有餘哀同鄉異顏面問我南京來教官固
多幸所媿非賢才

聲聲岡上石纍纍道旁堆客程間勞逸於焉憩奔走空
林人迹希垣牆穴狂飈荒涼撫遺迹尚想承平舊沽酒

禦渴飢僕夫頻問扣前行沙路灣
瞥然雉飛雉

是日暮至滁州城下問軍舍宿歇
適希貢亦在沽酒共飲有於滁城
河新得魚者買而烹之用以侑飯
勞苦飢渴之際覺其味絕甘美夜
夢王叔載先生借獲于山學士文
集予答以馬易之家有之覺後不
知所謂口占二詩為之悽絕

蓬萊海上別經年
星斗離離夜滿天
夢裏不知身是客
文章却詫玉堂仙

牀頭拜別思離離千載斯文付與誰客路滁州風月夜
夢中祇似在家時

十五日自滁州東門起行望瑯琊山近在咫尺土
人謂醉翁亭遺迹尚在慨然成詩時希貢奔駛而
去自是不復相遇矣

峩峩瑯琊山近在滁城東人言醉翁亭餘迹荒榛叢粵
昔承平時淮海消兵戎風流賢太守宴遊日從容座中
盡冠帶談笑生清風喧然觥籌錯寧畏樽壘空酒闌衆

客散鳥聲斜日中雄文紀蒼石山水同無窮肆令後千
載俛仰歐陽公岡巒一長望佳氣何葱葱靈飈颯然至
彷彿精神通

午後二十里至清流關關內外左右兩山迤邐相
對中夾清澗滁州諸山此為最高當衝要之地故
為形勝大槩如吾定海鳳浦嶺而危峻不及巖巒
堅硬如湖州石有宋淳熙紹熙間名刻淳熙磨滅
不可讀紹熙則趙思瓘與太守莫洗以慮囚來游

紀歲月後一石則莫太守勸農復來刻詩其上詩
云病起衰翁形似木情多老叟醉如泥麥殘雨刺
水鳴隴月裏農忙雲破犁溪柳帶愁知客意山禽
解事向人啼明年此日花時節我亦東歸君亦西
關下小沼廣不四尺深不二尺而水清如艷尤甘
冽有元皇慶延祐間達嚕嚕齊瑪哈穆特以勸農至
此覺石上微潤意有泉源命掘之果得泉因甃為
沼以濟行者之渴仍刻石其中此皆有志於民社

而圖為不朽者也歐陽公云昔宋太祖以周詩破
李景兵十萬於清流關下生擒其將皇甫暉姚鳳
於滁東門外遂以平滁即其地也慨懷舊事率爾
成詩

戕戕清流關形勝壯淮甸南來入江海北去通潁汭
昔五代餘諸侯日酣戰蟠李有餘技遐取寢席奠設險
禦中州紛紛甲兵繕傳呼點檢來威聲炎火煽良將致
生擒面縛轅門獻一笑滁州平凱歌錫芳宴肆令歐陽

公登高情眷眷我行入濠梁居然腰脚倦前登最上頭
目力窮視盼前修有佳句鑿鑿蒼石片風流今百年有
如親覲面臨流一徘徊樓樓雲物變僕夫催進程山風
急於箭

是日宿山農家道有廣德糧長家人憐予力倦為
挑行李數程既得所寓沐浴酌酒就睡兩足已成
胝矣次日問程時蠶麥將成禽鳥上下作家家鋤
磨之聲因起江南之想

黃雲覆隴將登麥白雪盈筐已熟蠶山鳥爭鳴人欲去
離離情思渺江南

十六日行至池河驛復過廣德人夫顧挑擔過大
鎗鋪登山脊行十里復下平地過清澗鋪復登山
而行山中多檉櫟木翁鬱深茂四望無際下至酒
家寓宿傳聞山中有藁葬者是鄉人盧義云

十七日行三十里而止十八日開良官吏自陝石
來者迤邐不絕多浙東故識若蔣均章董道傳云

十九日到濠梁城外十里鋪宿歇

二十日早入城道逢於用達先生入府學訪梁先生伯益早飯繼謁趙先生木仲遂見府縣諸公至五月二日供職縣令樂公以下畢集府學梁先生暨睢寧知縣葉彞仲亦至同鄉長者則卓樞司彥明俛都司可伯與周彥高夏敬中陳敬本祝文紀陳可明汪均保也

答孟教授見寄

瀛海家千里淮山容半年日餐荒學廩月給待官錢問
道多瓊佩游心有錦編故交逢諫議書枉滿懷牋

老大成蒼鬢悠悠四十年匱藏憐寶玉囊罄惜金錢禮
樂天人策春秋法律編斯文當未墜隨意擲金牋

附錄孟教授詩

迂時罹重譴謫地度流年每就廣文飯曾分司業錢
資身無長物貯腹有殘編欲寫農書進難憑尺素牋

附錄趙木仲先生和詩

垂老逢遷謫相看又六年屠龍空有技對菊笑無錢
琴冷陶潛趣堂孤魯叟編故人多念我垂意寄蠻牋
髮短烏紗帽飄零屬暮年還鄉那得策買酒不論錢
孤館驚秋至新詩帶露編應憐爾同疾離思繞吳牋
七月九日台州秀才戴起南以授真定元氏縣丞
過臨濠與滄州南皮縣主簿越人鄭汝賢見過十
日回謁而河間東光縣丞陳鼎趙州寧晉縣丞項
真皆在二人亦泐彥皆年五十以上笑出除目知

鄉人夏閱景文授饒州浮梁知縣王仲桓貞陝州
盧氏知縣方彥修潯州南平縣丞史文可平樂立
山縣丞韓原禮賀州富川縣丞烏擇善開封許州
偃城縣丞胡惟喆歸德鹿邑縣丞李惠吉真定阜
平縣丞是日午後擇善惟喆惠吉來明日早飯後
別送至淮河上

內殿除官奏目開諸公衮衮盡賢才十年苦志垂編簡
一日恩光被草萊野澗晴波踰絕澗山低赤日冒炎埃

同鄉故舊多憐我為向臨濠市上來

七月十三日早夢小兒復昇

驥子憐渠少依依夢寐頻膝前從伯父乳下賴慈親梨栗何從得詩書及早親我如猶未死當見爾成人

十四日渡淮河謁前樞密院都事李子雲得馬易之海雲清嘯集子雲言易之大致甚的初易之以代祀海嶽復命於京時僧格實哩以樞密院同知領軍東薊州易之以編修保充從事官後廷命樞

密公移軍直沽易之以老病軍旅中艱於行履日
以為憂子雲嘗譬解之子雲未幾以軍事前去既
歸而易之已病風不能言矣蓋醫者不識症誤為
傷寒以承氣湯下之大小便不知所出後易之有
著作之除含糊微笑而已蓋子雲與之同居多視
其湯藥至死迄無一言戊申五月十一日也次日
棺殮葬於靜明寺栖霞亭松林中其友危於懣陳
伯剛楊松實為用力遺衣散與力士所齋文籍事

文類聚文獻通考各一冊為梓北山取去海雲集
及著作郎勅牒留子雲家兵至內府勅牒付諸火
子雲居濠梁與予相遇既以海雲集見貽且云其
墓軍旅數經恐已不可保矣

出使錄

洪武七年甲寅七月十六日奉中京太守張公檄
命於泗州虹縣王莊驛盤量官貯米菽予不得辭
次日渡淮河歷虹縣境六十里慨懷張魏公命李

顯忠出師事繼而成詠

泗州跨長淮屬邑名虹縣在昔承平時民物實豐羨邇
來二十年適值兵革變廣畝失耕耘連天荒草遍煙火
茅屋低林深隨隱現居然十里間突兀聳郵傳憶昨宋
金時封疆界南北民生百戰餘鬪髓深水窟桓桓李將
軍提兵志恢復廟堂議金幣下策甘屈辱奇功滋不成
於焉罹挫衄謀謨紛異同悲哉諸相國往者戰爭場今
實興王地煌煌帝者居廷闕瞻象魏扶桑曉出日丹青

煥佳麗父老對我言白髮逢聖際向來目所見恍惚如
夢寐長淮古河山銘功書帶礪皇家基壯圖千秋并萬
歲

王莊驛

亭亭王莊驛棟宇如飛翬旭日曉東出黑白爭光輝
樨馬蹴芻莖振風一長嘶使者奉王命捧檄來如飛廟堂
重機事山川急程期

苜蓿園

青青苜蓿園浩渺蒼雲重守臣奉上旨耘植資人功柰
何秋月交陽日愁蘊隆既失雨露濡況乃傷螟蟲驛騶
待朝秣曷奉天駟供茲馬懼獲戾中心鬱忡忡予生忝
教席每媿朝盤空俛懷天地間生意無終窮撫事一長
嘆蕭颯來西風

王莊驛吏徐永吉長沙人嘗為湘陰縣學訓導謫
吏於茲與予邂逅間厯道汨羅遺迹及近代成敗
事即予畫扇作詩以示予識其意遂用韻

淮上山川如畫屏
太平久已息邊聲
驛亭借榻西風夜
喚起在牀天未明

日落山西一片霞
愁來有路不容遮
秋風三徑陶彭澤
正待南歸看菊花

北來有客正思家
夢斷西窓月未斜
征雁不來秋欲老
湘山湘水渺天涯

憐君蒼髮已蕭疎
萬里風雲失壯圖
莫道長沙南國遠
秋深歸艇問耕漁

用徐永吉六言韻

庭下秋風帶草燈前夜雨簷花客路三千餘里西窓夢裏還家

影動月中丹桂香傳徑裏黃花悵望瀛洲何處白雲即是吾家

驛中書事示古驛丞仲彬

銅鈴響奏候前驅王事恭承使者需晉國不須誇屈乘漢家何必數宛駒涼風庭院梧桐落旱日園籬苜蓿枯

聞說山中傳棗釀秋深肯寄草堂無

將歸學中懷周彥高

涼風早已入衾裯半榻蕭蕭蟋蟀秋庖爨一瓢傳客饌
倉儲千擔唱官籌天低庭闕皇城近雲渺山川驛路悠
明日振衣歸去早隔隣呼語夜燈幽

洪武八年乙卯承奉府檄差委館伴國學小秀才
分教所屬州縣泗州三人溫州孔希直士清王吉
保宗義支中思中邳州三人溫州方季先金華楊

思慶包宗達徐州四人明州陸文敏尤恭彥戴莊
陳孟雍宗穆廿二日於廣運橋府倉謁太守張公
告行廿三日給驛驛中題畫三首

蘭石山禽

荒蘚石嶙峋幽花似故人翠禽枝上語遙憶上林春

紅梅

一點胭脂暈玉腮分明仙骨換凡胎絕憐姑射山中客
也向瑤池赴宴來

梅

山中憶昔友羣仙
夜色如銀月滿天
圖畫相逢成一笑
歲寒冰雪想娟娟

是日午後問程行九十里至五河驛約二鼓矣廿
四日飯後至龍窩驛一百二十里又一百二十里
午後至泗州致命州學正陳楚賓置酒知州王某
及同知節判來見是日宿學中廿五日早謁大聖
寺於州學生端嚴家飲酒仍於學中早晚

大聖寺

百尺浮屠上碧空
玲玲金鐸響天風
畫簷爭訝琉璃碧
寶柱猶誇瑪瑙紅
蓮座旛幢嚴像設
範粧丹碧煥神功
扁舟飄蕩天涯客
一炷爐爇肝嚮通

是日午宴州後廳
遂別晚過龜山舟師言上有深井樹屋覆之面構巨石擊之闐然有聲殆銅支祈所耶泗州學訓導郭某為予言泗苦水患故老相與立神以祀之以水為陰類故以母稱後世附會

有泗州大聖破水母娘娘之說此足以破千古之惑矣是夕星月昏暗風浪奔駛四顧茫然罔知所在登岸問居人以驛尚遠拋碇止宿

青山如伏龜巨石壓晴浪岡巒相起伏隱隱城郭狀憶惟南渡餘金戈嚴保障封疆南北分放歌一悽愴鐵鎖固支祁禹功千載上吁嗟水母稱誰能辨誣謗

鐵佛

彌陀色相本來空金鐵何須火冶功莫似銅仙辭漢室

潛然鉛淚洒秋風

廿六日早行至洪驛驛計一百二十里飯後至清
河驛計六十里又六十里至桃源驛訪分教小秀
才温州林式安嚴州徐汝玉知縣殷某亦四明人
因與教諭姜某同為謁見殷亦與縣丞徐某答禮
舟中且有雞酒之餉廿七日早過宿遷計一百二
十里太守王某與吏目某同出迓五騎同入內館
驛中廿八日早太守暨僚屬同至置酒而別見睢

寧知縣葉晏仲復置雞酒道舊而去

圯橋

暮雨荒城二尺泥山人騎馬過橋遲山川風土元非昔
空憶留侯進履時

歎息秦坑一燼空誰知授受有兒翁漢家三百年天下
都在殘編斷簡中

黃河上衆小秀才索贈賦律詩一首

天子在位之八年春三月命國子生分教天下

於是上舍生四明陸文敏尤恭戴汝莊陳孟雄
入試春官中上考賜寒暑衣各二襲拜恩禮畢
乘驛詣中都鳳陽之徐州某忝教臨淮奉府檄
館伴以同鄉之誼賦詩以贈云

風流文采屬英髦上國翩翩步武高日射丹山翔彩鳳
雲開滄海現金鼇成均講侍臯比座尚局恩承錦繡袍
分教不辭千里遠長淮一舸泛晴濤

廿九日五更到房村驛一百二十里早飯過呂梁

洪登岸讀趙吳興所著呂梁廟碑其神蓋關羽尉
遲敬德云午後抵徐州州判黃文博出迓跨蹇入
城宿察院西房六月初一日入徐州學飯後與諸
秀才謁指揮諸公因出南門登亞父冢千佛巖入
黃茅岡循戲馬臺而迴

黃茅岡頭蒼石擁野色微茫雲影動千年亞父骨已灰
莎草殘陽卧荒塚項王本是叱咤夫凶強不義非良圖
咸陽三月火不滅歸來却作彭城都鴻門玉斗散如雪

舉手空持雙玉玦，貌貅萬竄困成臯。
奇謀弗遂身殞絕，窀穸悠悠不復朝。
白楊夾路風蕭蕭，昆吾鐵冶資盜竊。
寶氣寧復衝雲霄，楚漢紛爭一杯土。
往事空嗟鋒鏑苦，英雄半世死即休。
翁仲荒郊泣秋雨。

戲馬臺

上有駐蹕亭以今
上位所嘗巡幸也

彭城古名郡，城南屹荒臺。
吁嗟叱咤夫，霸氣何雄哉。
名雕不復逝，悲歌有餘哀。
烏江百戰死，餘迹傷蕪萊。
寄奴亦王者，登高荐徘徊。
晉祚既已移，老姦恣雄猜。
公議紛

是非墨客誠多才於今天下平車書同九陔梯空一長望
浩浩風雲開歸茲駐蹕亭重望鸞車來

初二日早飯黃州判家午飯饒原德館中陳希貢
繼至意氣洋溢後會飲州廳至暮而迴初三日會飲
江中歸與希貢諸小秀才酌別初四日早到徐州
午後至房村

呂梁洪

大河西北來飛淙相噴薄巖崖刀劍攢神功偉疏鑿舟

師力挽絕顧步恐前却夷然脫險艱呼酒傾鑿落中原
疆土深塵沙藹冥漠岡巒相經亘隱隱若城郭清風何
颯然翩翩下雙鶴

峩峩呂梁山形勝跨千里亂石激奔流紛紛浪花起
茲南北衝舟來紛若蟻倉皇卜安危樽俎設牲醴神靈
古名將盛德百世紀精誠一念通惠然錫福祉共惟吳
興公卓哉古良史文章千載傳矢言同此水

初五日到邳州陳州判惟仁請早飯晚到宿遷

驛見方繼先而別至下邳舊城

泛舟下長河山川記游歷荒城烟火稀塵沙暗荆棘憶
昨漢運哀藩臣構強敵明星耀長戈震雷轟巨石智力
相長雄危亡期日夕布也善解紛一箭中鳴戟阿瞞終
不容轅門就維繫丈夫事慷慨殺身何足惜亟呼大耳
兇縛虎怪繩急英雄荒戰爭浮雲翳白日仰視天茫茫
風波如矢激

掛劍墓

世情生死謾悠悠許與誰知死後酬珍重延陵吳季子
劍光千古照清秋

初六日飯後到桃源驛見分教嚴州徐汝玉温州
林式安晚到清河驛阻風夜泊初七日五更早行
午到洪驛見分教婺州李希文阻風夜泊登淮瀆
神祠其神劉李二姓內有元朝加封官爵小碑刻
一片鐵瓶係故宋物皆網戶得於淮河中香爐有
大宋國號究而觀之蓋龍鳳紀元云

長淮浩千里形勝天下壯明神有攸司斯民聳瞻望棟
宇嚴神棲輕颺颯虛曠綵旂欲飛揚靈舟駕晴浪紫鳳
及天吳導迎紛下上精忱貯靈中惠然錫嘉貺

初八日早行晚登

缺

山入人家問酒無有初九

日早到盱眙登岸入學中謁教諭周伯虎及小秀
才王宗善伯虎早飯遂登淮山書院在半山中鑿
巖石為梯徑山勢四重樹屋其上四望無際山光
水色儼如圖畫下有玻璃泉鑿作獅子口流注前

後上覆以亭下注以池甃以磚石隔分之實為絕
勝地米元章第一山真刻遠近傳摸外有四明鄉
先賢名諱若林公某史公彌大皆以館伴金使至
此又足以發當時南北之一晷是日過泗州見二
小秀才及學正陳楚賓而別初十日至五河驛中
驛丞孫行簡以詩鳴要至遠碧亭求題遂至南門
入學中見同年友胡惟中五河知縣許某置酒惟
中復以雞酒分餉十一日晚後回臨淮十二日入

皇城復命府中是夜宿國學十三日歸

洪武九年閏九月奉鳳陽府檄齋擎諭旨至懷遠
縣壽州六安州開讀是夕登驛舟發淮河翌日到
懷遠賦律詩一首

長淮曉霧散氤氲海日遙升五色雲玉帛舊曾誇禹貢
絲綸今復覩堯文佩瑤聲合朱衣動錦綺光開綵仗分
宣詔廷墀癯老聽山呼齊祝聖明君

是日開讀禮畢宴罷登舟中夜不寐詠懷古迹四

篇

抱璞巖

抱璞當年泣卞和
續紛淚雨灑煙蘿
篆文刻得先秦璽
從此人間戰伐多

夏貴城

淮源桐柏來浩然
滄海注荆塗界東
西屹若龍虎踞憶
昨建炎初六飛向
南渡淮海為邊疆
兵家爭勝負壯哉
懷遠軍大將旗鼓
樹對壘彼何人使
節嚴備禦版築勞

人功用以寬北顧胡然陽羅敗凜凜生死怖束身歸異
朝衰老復榮遇蓋棺公議定斧鉞誠可懼白骨葬青山
聲名同朽腐荒城塵土深草蔓亦多露我行覽遺迹躊
躇不能去

夏貴既死將葬有僧祝之曰今年八十三何不七十
九白骨葬青山萬古名不朽而世指謂呂文德非也

荆山

荆山面長淮清光醺空碧衆峯相低昂巨石作人立輝

輝秋月寒霏曉嵐濕泓然寒泉流玉坑見陳迹世塵
珍砥礪巨寶誰復識山空夜聞寥如聞卞和泣

塗山禹廟

淮海南來翠輦遙丹青遺廟倚雲霄山川久據千年勝
玉帛曾聞萬國朝古柏森青深劒戟靈泉淺碧瑩瓊瑤
山前欲問神明胄草屋荒烟暮寂寥

十九日至壽春有懷舊事

壽春古名郡形勝壯淮甸士馬精且強風寒當一面憶

昔梁齊間封疆日酣戰向背吁不常版圖朝夕變民生
良亦艱流言競嗟怨王琳亦烈士衆情獨趨羨諒其忠
所事忍死艱難遍來奔非本心假息命如綫胡然兵刃
加慟哭同貴賤滄茫十里餘嗚呼淚奔竅爾來數百年
紛爭幾兵燹山川風氣殊古人那復見仰視八公山塵
昏雙目眩西風天山來淝水疾於箭

八公山

八公山青孱顏巖崖崦岫

闕

浮雲白日時往還秋

風落葉紅飛翻八公山人竟何往鴻飛冥冥不可攀河
漢天高月華白如聞玉佩聲珊珊長淮東西渺千里雲
濤雪浪淝河水符秦傾國來百萬貔貅甘送死草木風
鶴皆晉軍倒戈棄甲若山委腥風吹血川原丹雨濕天
寒泣殤鬼捷書露布俘纍纍東山碁奕如平時入門不
覺履齒折矯情鎮物將奚為山川風物成今古豪傑紛
紛何可數東烏西兔流年度蒼鳥悲啼如泣訴人間成
敗本由天當時却笑袁公路八公山天險據壽陽城深

秋日暮晉代衣冠成古丘淮南賓客誰能賦

二十日夜宿安豐城

浮雲蒼野雨連空寒草淒涼一望中跨鶴願隨王子晉
騎驢誰識杜陵翁征衫濕透潢汙水短席寒生破壁風
可是董生多孝行客途猶喜過安豐

二十一日過芍坡

荆尸跨乘廣睥睨周鼎器叔教為輔相諸姬肆吞噬孰
知芍坡塘乃為吾民利吁嗟不朽功斯足傳後世長堤

茫茫西風秋方渠曲堰通清流原隰粼粼犬牙錯金穰
穰稔黃雲收堤上人家住林麓土塹圍牆草苫屋一身
祇作屯田夫名隸旗頭載軍牘太平久矣無戰爭牽牛
日日勤稼耕西成釀秫作春酒衣食自可全餘生去年
坐為官長累幼女鬻錢當租稅牀頭愁婦傷別離夜雨
殘燈背垂淚今年霖潦傷秋禾日食歲計愁無多明明
天日照下土軍中幸喜無徭科天宇秋高氣蕭索荏花
蘆花如雪白雉聲格格飢鷹呼鶴駕入雲飛帖帖我家

本住東海頭三年遠作淮天游
茫茫芍坡水六月荷花如錦綺
惜予不向南薰來洗盡平生炎
俗埃

廿二日晚至白沙城

天低曠野舊城空紅葉飄蕭晚
照濃故老慣經兵革遍
太原欣覩紫泥封

廿三日入六安州開讀

草木城深曉寂寥風流猶復仰
皋陶浮光西望羣山出
桐柏東來一水遙漢闕勲臣終
忌布宋家科甲尚聞焦

宋有焦炳
炎兄弟

龍廷呼舞聽頒詔禮樂從今識治朝

廿四日回程廿五日行六安壽州道中有懷夏原

威

使命匆匆馬上歸淮天空濶思離離免園有冊頻憐我
甌石無儲欲問誰雪白蘆花堪作絮霜紅柿葉好題詩
獨懷夜雨燈前客想像商巖詠采芝

廿五日遇雨過安豐止宿

野水寒深二尺泥斜風吹雨濕征衣淮鄉城郭愁中過

海國林泉夢裏歸沙馬簫雲寧復駐渚禽拖水不停飛
荒垣咫尺安豐近擬向郵亭候落暉

廿七日回至壽州與國學生高允昇同攜雞酒至
真珠泉

滎陽外史集卷九十八

欽定四庫全書

榮陽外史集卷九十九

明 鄭真 撰

進牌錄

洪武十七年三月初六日該奉吏部符文中外教
官九年考滿從本取正官考覈三年一考必合進
牌二十五日交割條記五月初三日給由到臨淮
縣張泰考覈本官任內行過事績並無粘帶不了

事件及訓誨生員果有成效允稱前職知鳳陽府
事王某考覈得本官經學淵源育才有道似此掌
教允為稱職七月初三日給張字一百三號紙牌
一面及半印勘合批文限十五日赴部初七日早
拜辭先聖與吳教授先生義孚起程府縣學訓導
及衣冠士友暨諸生送者四十餘人十里鋪酌酒
為別晚宿三十里店成五言詩一首

步出清流門疾風炎火煽遊子慎行役中情見顏面同

袍皆巨儒禮重斯文餞蟻香進樽壺饌羞列庖傳握手
勸加餐重來慰深願芹邊風月清青氈心戀戀進牌有
常程雲霄快良便行當覲天顏拜舞黃金殿

初八日至張家店鋪憩陶叔睿家叔睿見其妻女

出家釀烹雞鵝早飯

驛路蕭蕭水竹村故人相見藹春溫通家自有三生契
知己難忘一飯恩客況多年荒楚甸仙遊何處覓崑崙
舉頭但覺青天近玉殿行當奉至尊

是日午過紅心驛炎暑少憩出逢王叔潤陳仲良
割肉沽酒及見縣吏錢某驛丞姓某復烹雞設饌
夏原威適在座禮畢而別晚宿黃連鋪店

亭亭紅心驛翬飛聳華構使者詠皇華秣馬紛在廐
坐中庭深冰泉汲寒甕秋暑威餘毒甘冽資盥漱故人
幸相逢雞暑延日晝以茲頓踣餘欣然為相就

初九日自黃連鋪店起程午過池河憩賀大舍魚
善家酌以阿刺吉酒晚宿大山鋪店

池河亘淮海沙水白瀾漫天高風日清白鳥鳴相喚長
橋卧垂虹行李若魚貫郵驛官道傷丹青何炳煥使騎
懸旆旗咫尺上霄漢我行慎修途赫日晝過半道逢賢
主人恭敬何敢玩芳列出名酒軟香炊白粲寧知困踣
餘值此青眼盼意欲厚報之媿乏錦綉段踟躕忍言別
冉冉日云宴

大山

大山高崔嵬鬱為淮海壯諸峯如兜孫羅列星拱向雲

烟倏變幻昏旦千萬狀猛獸向人號陡覺心神喪向來
爭戰場絃歌敦禮讓恭惟聖人出高視千載上朝貢集
京華犬牙錯平壤我行崖谷深振衣一長望夕陽渺前
林樵牧涕清唱

初十日早飯仙居澗店俗稱牽驢兒坂遂過柳灘
驛至大鎗巡檢司批引宿清流關下

梯空下山來云是牽驢坂頓踣險且艱有若度危棧山
翁喚我來一笑捧雙盞何人問出處撫席覺顏赧老來

合投間尚復占仕版家山渺蓬瀛客行安得返試問仙
澗居何當招折簡

大鎗嶺

峩峩大鎗嶺倏忽十餘里自通驛道來鎗削平如砥恭
惟神聖出夷險同一軌寨官司徼巡干戚間弓矢寧知
王道正文武合張弛太平衢路清樂哉遠游子

清流關

清流關上雲陰陰清流關下溪深深輕車快馬日馳逐

險艱殊覺勞人心舊日爭誇走小月健卒生兵縱超越
南兵敗走寺鐘鳴落馬橋邊歌凱捷端明殿高雲蔽天
宋家帝業三百年南渡區區保形勝中原北望空垂涎
兩淮遙指東西路潁壽茫茫隔塵霧太平尚憶戰爭時
岡隴高低暗烟樹聖皇御極天下寧龍蟠虎踞朝神京
周家岐雍漢豐沛向來險阻何足憑兩崖壁立蒼石古
山風蕭蕭不知暑西南更望瑯琊山太守風流仰歐五
十一日行十里買飯至滁州過葛城驛憩午至茅

堂買魚沽酒行十里宿烏衣店

滁州

翼翼滁水陽淮南古名郡膺運啟文明大哉天子聖
睠茲帝業居允為民社慶封疆隸中都湯沐誇巨鎮
賢才集時髦三接承寵命寶馬青絲纒累累佩新印
既醉歌太平悠然播周詠

葛城

古城何嵯嵯云是孫吳舊諸葛彼何人史家紛莫究想

當鼎峙時烽火嚴斥壘地利屹如山犄角勢相救北兵
忽飛渡版築計何繆荒涼泥土深紛紛穴狂鼯過眼閱
廢興俛仰慨宇宙

十二日自烏衣店行十里早飯晚宿客店成詩二
首

今夕復何夕憩此嘉樹陰明月自東出照見千里心美
人期不來憂思邈悵悵山中萬籟寂悽悽猿夜吟風生
海上波露下淮南樹愁思不成寐耿耿河漢曙寂寥山

谷秋懷人悵遲暮百年一瞬間永言保貞固

十三日行十里至駱駝嶺早飯午後至浦子口造
江浦縣學訪林教諭子實題畫二首以贈遂訪武
德衛知事陳可明鄉友因見其父實日賓割雞鵝
具果核以待霑醉而歸

題菊花一絕

采采黃花雨露繁秋香不肯老霜根朝京若得歸來早
籬落西風共酒樽

題小景一絕

為愛茅堂傍水開百年空老棟梁材
山翁遇我還相笑何苦騎驢冒熱來

十四日早飯後絕江攀船而登既渡跨蹇入會同
館首見孫大雅先生許廷慎給事遂泊客店詣嚴
廷儀禮司報名以見

承天門下曉聞鐘一介臣微忝會同晚歲莫殫忠力報
此生多幸姓名通旌旗高擁彤墀日笙管清諧寶殿風

聽徹靜鞭容緩步佩裾聲散玉玲瓏

十五日早朝奉天殿行五拜禮既出詣通政司附簿遂至考功監進牌後署年月日姓名畫字其公使一人引至通政司附進牌簿遂通名入吏部叅官部郎官畧問所由答云云部官王郎中等有言公輩來良誤已改正符鳳陽府矣

吏部符文趨進牌青雲步武上天階久推宗伯聲名重多羨賓僚德望偕俊造成周嚴黜陟賢良先漢慰招懷

銓司公選明如鏡却媿相如祗類俳

十六日

十七日入吏部進供狀

二十日入朝奉天殿通門籍

二十一日隨衆朝華蓋殿行一拜禮給事中張某

請為奉天殿早朝詩吳教授義享云銅壺銀箭曉

星催金闕千門次第開雲集衣冠瞻御座星聯劍

佩擁仙階韶鈞近自中天奏象貝遙從外國來何

幸小臣逢聖際欲陳美頌媿庸才陳學正楚賓云
紫陌纔分海曙紅九重閭闔自天通簪裾列陛千
官肅玉帛來庭萬國同風合八音和舜樂雲舒五
色繞堯宮微臣何幸逢今日沾沐皇恩雨露中鄭
教諭真云鈞天九奏合雲韶萬國衣冠候早朝日
擁龍帷明袞黼風生螭陸颯瓊瑤象琛久已通南
徼干羽重逢格有苗正遇君臣千載會不才何以
頌唐堯吳教諭煥云金鋪魚鑰啟晴雷閭闔重重

次第開袞冕光浮龍日現蕭韶聲奏鳳凰來衣冠
載拜傳臚唱綸綍多揚屬聖裁自媿衰年謬通籍
同聯鵷序上蓬萊胡教諭士安云鐘鼓聲催冠佩
集五雲深處望蓬萊六龍近自層霄出七象遙從
外徼來禮樂熙熙昭治化衣冠濟濟總賢才黃金
闕下初朝散帶得天邊雨露迴教諭周伯虎云金
門九重啟玉帛萬方朝旭日明丹闕祥雲會紫霄
衣冠沾雨露樂舞奏簫韶喜有變龍會賡歌贊帝

堯

二十二日至二十六日並朝華蓋殿

二十七日朝華蓋殿是日單主事仲修來與之飲

酒

二十八日正朝奉天殿有旨再朝華蓋殿

八月初一日正朝奉天殿

初二日朝武英殿是日夕以上丁宿國子監

初三日朝奉天殿與賜早飯

早朝口占

柳拂星河露未晞扶桑天近爛朝暉
武英殿下朝參散
劍佩風流馬上歸

初四日朝奉天殿隨班奏事

初五日朝奉天門是日賜早膳口占一絕

重重仙仗擁天階玉座雲移雉扇開
禮祀告成頒福胙
穀珍送出御厨來

初六日朝奉天門

初七日朝奉天殿賜酒飯

初八日初九日俱朝中右門

初十日朝中右門起居華蓋殿東宮文華殿行慰
禮賜粉湯饅頭酒肉

十一日朝華蓋殿

十二日朝奉天門

題闕
堂贈王通判復職

燕寢怡然衽席間綠衣長得奉慈顏翠簾影動微薰入

錦瑟聲遲白晝閒壽考久聞登寶籙懽娛况復對青山
蒲城父老來相賀應為佳兒入覲還

十三日大朝奉天殿以祀先代帝王傳制聞明經
秀才聽選文華殿年皆近七袞東宮意憫其老姓
彭名敬初者將髭鬚對以臣老當益壯遂除大理
評事姓劉名伯原者對以為臣盡忠為子盡孝臣
不敢辭遂除江西蒲圻知縣傳者頗以為笑

十四日朝奉天門

十五日上祭祀還宮朝奉天殿賜酒飯

十六日至十八日朝奉天門

十九日朝華蓋殿

二十日朝奉天門

二十一日雨奏事免朝

二十二日齋戒免朝

送僧歸莆田

袈裟惹得御爐烟笑指長江萬里船老我欲聞真實諦

多師久悟上乘禪墨花散彩經翻貝雲錦生香鉢吐蓮
飛錫歸來閩嶠遠一龕坐對月中天

二十三日至二十五日齋戒免朝入部進供狀

二十六日行禮

二十七日正朝奉天殿百官謝成禮

二十八日朝奉天門入部中余尚書詳詢九年考

滿緣由令換供狀

送僧歸莆田

祖關直上透玄機妙悟真空萬法歸自許金繩開覺路
誰將玉帶解腰圍山中出定雙龕啟闕下來朝一錫飛
笑我亦居三佛地相逢客館願留衣

二十九日朝華蓋殿吏部員外郎蘭景芳延入公
署共坐論經學文章之懿因求著鑑思堂記

三十日朝華蓋殿入吏部進考覈呈子

九月初一日大朝奉天殿司天監進大統歷是日
與陳楚賓胡士安徐景顏周伯虎入吏部說書而

余為首唱余尚書問出處大畧

初二日朝華蓋殿

初三日朝華蓋殿得吏部手本過儀禮司謝考覈
稱職

初四日與徐景顏胡士安入謝華蓋殿是日吏部
王郎中令入內聽除

初五日朝奉天殿千秋節與賜酒麪

初六日朝華蓋殿

怡雲軒

為愛山雲似畫屏
禪龕花竹畫冥冥
游心物外真無礙
沛澤人間信有靈
座席氤氲頻入定
香煙披拂共談經
納交說有陶弘景
日日扶藜喚啟扃

見山堂

萬疊峯巒氣勢高
碧天空濶見纖毫
巖花春暮飛紅雨
林樹秋深滾翠濤
簾捲晴嵐留客騎
履穿虛谷聽仙歌
知公賸得悠然趣
采菊詩篇欲和陶

初七日正朝奉天殿入文華殿聽選是日上御西
宮大庖吏部尚書余公某引教官九人入見賜宴
席上以菊綻西風露脂楓葉為題諸公應制詩凡
若干首云云見後

初八日朝華蓋殿既出就承勅監重寫應制詩再
進續御製首句二絕句云云見後

初九日朝華蓋殿教官吳烈等九人就版房聽選
侍儀司序班姓吏部主事張某傳旨召八九人於

華蓋殿東頭賜宴叩頭謝恩既罷各製詩凡若干首云云

應制賜宴詩什序

上御位十有七年九月初七日駕幸西宮吏部尚書臣余燠以教官九人臣吳烈等八見奏曰此皆九年考滿稱職者內三人以鄉貢進士選餘皆明經之士上命臣烈等坐賜宴席以菊綻西風露脂楓葉為題俾制詩以進既而御製詩首句一云碧

梧葉老近秋霜一云西風蒞菊露微黃命各續成章臣烈等承命惟謹詩既成冒塵乞覽上宣諭再三越二日重九上御華蓋殿罷朝命侍儀臣某吏部主事臣張某傳旨宣臣烈等九人上殿東階賜宴席既罷臣烈等拜恩以出咸賦詩以侈盛事既錄成什俾臣真為序臣真惟自古君臣際遇之盛宴賜之厚莫過於周小雅鹿鳴之詩始曰示我周行終曰以宴樂嘉賓之心是人君待下之禮為甚

至天保之詩始曰天保定爾亦孔之固終曰如月
之恒如日之升如南山之壽如松柏之茂是人臣
報上之心為甚厚君臣上下交相親愛此所以為
成周盛世也仰惟皇上勵精圖治仄席求賢而臣
烈等末學淺識辱承恩寵鹿鳴天保何以加諸粵
在宋時進士及第上己日與賜賞花釣魚宴詩在
當時以為美談矧今明良際會秋高氣清重陽令
節雨露之澤係千載一時之逢者乎臣烈等懼不

能報稱萬一安可不見諸歌咏以傳示無窮詩凡若干首皆有思致而忠君愛上之意溢於言外其得性情之正哉而臣某以淺陋之辭亦得廁於其列何其幸耶按九人出處畧同皆以流品常調升一等臣吳烈以鳳陽府教授授寧波府教授鄞縣主簿臣陳楚賓由泗州學正授南昌府教授臣朱景夔由陳州學正授東昌府教授臣陳孟敷由宿州學正授瑞州府教授臣徐景顏由潁上縣教諭

授衛輝府教授臣吳渙由泰和縣教諭授安慶府
教授臣周伯虎由盱眙縣教諭授台州府教授人
以為斯文之慶云

九日賜宴詩九首

九秋佳節屬重陽金闕天開樂事長丹陛曉班聯玉笋
銀罌春釀賜瓊漿酤顏頻記烏紗整老鬢盈簪黃菊香
慚媿小臣何補報山呼萬壽祝吾皇

臣吳烈

華蓋殿前蒙賜宴賜筵特許傍金扉光搖綺席聯雲氣

色照龍顏近日暉
白首一時成遇會
黃花九日共芳菲
文光此日應天上
太史占星識少微

臣陳楚賓

九日承恩華蓋殿
自憐蓬鬢已蕭騷
滿斟綠醕浮金菊
細縷紅絲切蜜糕
宴賜儒臣傳特旨
詩聯御製受榮褒
時人漫說登高去
誰似青雲步最高

臣朱景爰

華蓋重重寶殿高
綺宴恩賜忝同袍
瓊盃滿泛黃花酒
玉饌香分紫粉糕
共喜鎬京成樂豈
誰歌湛露擅風騷
午門歸步天街潤
縹緲西風落鳳毛

臣鄭真

菊節承宣到玉京叨陪燕集預公卿九重聖主施恩澤
一介書生被寵榮奉勅屢傳光祿酒分甘更錫太官羹
獨慚未有涓埃報但作歌謠頌太平

臣徐景顏

君王開宴賞重陽特召儒臣預寵光玉盞頻斟光祿酒
雕盤滿貯太官羊龍樓日霽浮佳氣寶殿風清散異香
報效未能惟祝頌皇圖聖壽與天長

臣陳孟敷

闕

臣胡士安

隨班朝舞奉天時寵錫欣逢九日期
袞冕再升華蓋殿
綺筵特命太常司
黃花盃泛黃金液
白貯盤登白玉脂
豈料闕

臣吳渙

應制詩一十八首

菊綻西風

西風菊綻萬枝黃
佳色新沾雨露香
令節近逢重九日
要從金闕壽君王

露脂楓葉

丹楓萬葉約胭脂曉色瀼瀼玉露滋粧點秋容益奇特

分明雲錦出天機

臣吳烈

菊綻西風

秋高萬木俱搖落籬下黃花祇自芳不是深恩私雨露
寧存晚節耐秋霜

露脂楓葉

一著微霜已自紅曉看重浥露華濃天工似與添秋色

獨向西風逞艷容

臣陳楚賓

菊綻西風

內園粲粲吐金英
分得清秋雨露榮
近侍當筵承賜予
寒香滿泛玉盃清

露脂楓葉

宮樹秋高玉露濃
天階深處錦重重
人言二月花相似
盡在皇家化育中

臣朱景葵

菊綻西風

秋葩剪刻見神功
風送天香入九重
有勅御園迎鳳輦
上樽玉醴拜恩濃

露脂楓葉

千楓高映綺袍紅
都在天家雨露中
秋色常如春色好
彩雲深處錦重重

臣鄭真

菊綻西風

西風佳菊吐金錢
正在重陽令節前
採泛玉卮為聖壽
天長地久萬斯年

露脂楓葉

玉露凝寒楓樹枝
鮮鮮萬葉染胭脂
料知造物多深意
要使春容滿四時

臣陳孟敷

菊綻西風

涼風從西來吹噓
苑中菊滿樹吐奇
花粲粲照人目香
浮白玉墀影照黃
金屋托根固已佳
異彼凡草木毅然
堅貞姿晚節愈芳
馥

臣吳景頴

菊綻西風

清商布律薦新涼節近重陽菊正黃露下九天滋玉液
風揚萬舞絢金裳芳姿不免尋常色餘韻應浮異樣香
上苑花神承渥重高枝奉獻萬年觴

臣吳煥

闕

臣胡士安

菊綻西風

赭黃相間錦紅鮮香藹天家雨露邊願祝君王千萬壽
花神長得奉樽筵

露脂楓葉

宮樹丹紅映錦袍
灩灩露浥九天高
秋光正似春光好
解使詞臣發興豪

臣周伯虎

續御製成章一十八首

西風蒨菊露微黃
采采金英滿殿香
擬獻聖皇天壽節
莫言開早近重陽

碧梧葉老近秋霜
玉砌陰清晝日長
正是文明開景運

喜聞鳴鳳在朝陽

臣吳烈

西風蒹葭露微黃
天闕秋高滿地香
儼泛玉卮稱萬壽
喜逢佳節近重陽

碧梧葉老近秋霜
玉幹凌雲色愈蒼
鳴鳳雖離聯雜佩
飛翔應不戀高岡

臣陳楚賓

西風蒹葭露微黃
靄靄天香近帝傍
滿泛金盃成宴賞
微臣亦得預恩光

碧梧葉老近秋霜雲錦重重曉日光生意本來天造化

涼聲先得間絲簧

臣朱景燮

西風蒨菊露微黃縹緲花香入帝傍見說花神承寵顧
畫欄深護翠雲涼

碧梧葉老近秋霜五色翩翩下鳳凰傳得教坊新樂府
試將歌管叶宮商

臣鄭真

西風蒨菊露微黃粲粲金英冠衆芳承得九天恩澤重
玉闌干外散清香

碧梧葉老近秋霜百尺高枝拂漢長清曉九天紅日照

雞雞鳴鳳集高岡

巨陳孟敷

西風蒨菊露微黃秋艷盈盈出異芳自是培蓂深得地
金英不老愈生香

碧梧葉老近秋霜疎影常分玉井旁喜有鳳凰來止集

翩翩儀羽五雲翔

巨吳煥

西風蒨菊露微黃粲粲金英噴異香正色居中深得所

花開長得奉君王

碧梧葉老近秋霜
照耀彤墀色焜煌
會見春風承雨露
綠陰深處宿鸞凰

臣徐景顏

闕

臣胡士安

西風蕊菊露微黃
玉殿清秋陣陣香
綺席長承天語笑
繁華何必慕春芳

碧梧葉老近秋霜殿角陰移月轉廊聖代承平鸞鳳下

卷阿亦得咏朝陽

臣周伯虎

初十日朝奉天門起居文華殿行慰禮賜宴席

十一日朝華蓋殿

十二日朝華蓋殿賜酒飯引入奏除而罷

十三日至十四日朝華蓋殿

十五日正朝奉天殿

十六日至十七日侍立文華殿朝華蓋殿

十八日萬壽節賜宴

十九日至二十一日隨班華蓋殿

題畫送樊推官

通家氣誼復同年
淮海相逢日月天
何日振衣歸去早
瀛洲海上問神仙

題畫送盧太守

重重金闕五雲飛
太守來朝賜宴歸
從此聲名登史冊
斯文千古有光輝

二十二日華蓋殿親擢大小官四十二人臣真等
九人咸預其列吳烈授淞江寧波府鄞縣主簿陳
楚賓江西南昌府教授陳孟敷江西瑞州府教授
鄭真江西廣信府教授朱景夔東昌府教授徐景
顏初除某府為有見職改除衛輝府教授胡士安
湖廣漢陽府教授吳煥安慶府教授周伯虎台州
教授

二十三日奉天門外榜示是日於吏部進供狀

送徐主簿奉職太和縣

謬通門籍上金坡殿角清風送佩珂瞻仰共承天寵洽
別離爭柰客情多霜晴紅樹淮山曉風颯黃蘆潁水波
歸見鳳陽洪博士教羶新復果如何

二十四日隨班謝恩於吏部進狀并告假上冢

二十五日除門籍招單仲修陳叔明二鄉友同飲

入吏部令考歷代東官僚屬史官典故

二十六日朝華蓋殿

二十七日入午門闕符契謝恩行一拜禮到考功
監銷牌

二十八日大朝奉天殿謝恩就辭給憑而出午後

二十九日單主事招飲

題永思堂卷

堂上年年看椿樹百歲栽培深雨露冰霜老却棟梁材
鳳雛切切空悲哀歲月繆悠長慕戀下土茫茫那得見

悄然獨坐中堂深音容恍惚思惜惜錦萱花開成五采
高堂但願春如海

題愛日堂

白日高堂春藹藹東望扶桑隔滄海堂上雙親七十餘
白髮朱顏長不改丰姿玉雪認佳兒雲霞五色老萊衣
百年鞠育恩罔極寸草欲報三春暉冠佩翩翩登上國
仕版登名誇得祿笑看落照在桑榆鼎養歡娛當秉燭
流光天上如飛梭浮世人生能幾何床前定省夜復旦

六龍整駕隨羲和為語羲和須暫駐子孝親慈慰遲暮
舉盃喚却蓬萊仙歲歲年年慶初度

榮陽外史集卷九十九

欽定四庫全書

滎陽外史集卷一百

明 鄭真 撰

歸程錄

十月初一日搬行李單主事家國監生陸好德韓
護李侑同置酒為別晚過國子監見姜敬章田子
真及龔司業先生

題雲山贈別圖與徐景顏

瀛洲望近白雲飛山雨初晴翠濕衣想見家人聞鵲報
白頭領取一官歸

初二日自國子監歸伏覲納幣禮容之盛前代莫
及日午飯單主事韓護陸好德送出土橋一里揮
淚而別行四十里宿管頭記詩一首

末學親承教職除南州還復送歸途雲囊尚寶傳家秘
丹匣重械內府符懸主猶應瞻象闕承宗深欲續基圖
舊時弟子來相別揮淚依依向國都

初三日早過淳化關批引跨蹇過句容入縣學見
車和仲教諭蒙酒飯相待晚遇雨宿十里店

初四日早起程至白兔僱車行四十里晚至丹陽
買舟而行律詩示胡知事吳主簿先生

十年淮客向為羈何意丹陽問道歸山鳥舊曾聞杜宇
家人應復嘆蚱蜢險經丘壑紆前騎怪見泥沙汙滿衣
幸有同袍相憫藉買舟河上看斜暉

初五日過奔牛呂城晚宿無錫縣西門

初六日自無錫起程飯後過虎丘晚宿姑蘇城下

虎丘寺

山徑重重磴道懸千章喬木藹雲煙劍光下蘸深潭水
塔影潛通小洞天古佛誰修清淨供老僧獨悟上乘禪
宗門亦荷斯文力來看諸公石上鐫

初七日飯後入蘇州府晚至海寧縣界

初八日入嘉興府至府學附國學錄項叔範書蒙胡

教授孟節待早飯

初九日早登

關

晚至會安埧

初十日早搬行李至後朝門

十一日入杭州府至友人葉有常家知其判官山

西某州見其母八十餘而強健如五六十歲云

十二日自後潮門起程過西興晚宿錢清

十三日自錢清起程晚宿紹興城下是日五更時

分蹤跡趙國祥家其子以舟來迎與胡知事吳主

簿同過割雞鵝早飯出其甥陳氏求著其父小傳

十四日自紹興起程過曹娥見傳憲史夜宿餘姚
西門

十五日入餘姚見王漢章知縣蒙賜酒而別及偕
掖垣類藁晚宿明郡西門

十六日早到家告祠堂祝文云真向以鄉貢去家
十二年今自臨淮教官考滿入朝九月初四日謝
稱職恩廿二日華蓋殿擢廣信府儒學教授廿七
日內府關符契廿八日給憑吏部謁告上家赴任

以茲吉日到家敢告

題求源堂

君家得姓本岐幽世遠須知一派分迺祖移居成別墅
諸孫力學踵清芬有懷遠寄吳江月托興頻招渭水雲
撰述幸憑燕許筆老成真足張吾軍

上任錄

洪武十七年閏十月十八日告辭先祠與家人大
小為別母舅蔣子通父送至社壇橋出西門親友

自
卷一百一
組宴烏繼善先生知縣家在座者烏先生父子及
朱剛中徐公義宋廷臣夏尚忠陳思禮葉某管敬
儀表弟蔣信忠舍親單彥高王中傳吳子浩黃取
友徐仲威仲章昆季酒罷廷臣公義送至大卿橋
再拜為別柴允可後至題詩以致惓惓晚宿徐仲
威家飲酒史君實以酒果來論舊躊躇而去以事
不至者吳主簿紀親家云

十九日早飯仲威家出數步見黃尚綱遂與登舟

至吳使君祠與張則存先生為別至望春橋見馬
鼎攜其迺父易之饒歌集而行壁上危太僕張仲
舉二元老詩揭以為贈晚沂江宿鸛浦

二十日早與舍弟千祥許某黃尚綱幼男復昇入
永樂寺謁泮禪師論四十年之契延欸素飲出水
陸薦蔬具列先生及教授名位爵號蓋以師生之
契故也思慕不已再登雨微峯見闡國師登後閣
上周覽形勝下入泮公房午飯以青蚨二緡及茶

酒醬醕相贈友人余知縣伯熊陪遊終日贈以律
詩

玉山雲外碧
堯咨衝雪寧辭去
路遙西狩獲麟傳
舊學
朝陽鳴鳳屬新朝
客羶猶帶冰霜苦
講席仍沾雨露饒
枳棘暫棲黃主簿
鄉心應托甬東潮

二十一日五更早行過餘姚以不得見王漢章深
為悵然飯後過通明暮過曹娥夜行通關數十里
成律詩一首

扁舟薄暮過曹城古往今來感慨多
風滿沙汀翔鸛鶴潮深窟穴吼鼉鼉
巡防星聚軍依律團憲煙飛國有科
倦客思家還作夢隔船聽得唱蠻歌

二十二日入紹興城早飯許二官家至山陰會稽
二縣學訪教官不遇見學生數人而已晚到趙國
祥家蒙贈雞酒飯米出其甥陳氏再拜請著其父
小傳益勤予不能拒也夜過東西二堤

二十三日渡江到杭州後潮門

二十四日與舍弟千祥雞酒為別出柵門登六和塔遂登舟

六和塔

孤塔危欄薄暮登重重鈴索絙觚稜上方自可通天闕
下界誰能送佛燈於越山川迷遠近子胥濤浪怒憑陵
紛紛歷劫塵遮眼試數前朝幾廢興

二十五日過富陽縣晚宿陽家埠

扁舟輕趁富陽潮路轉長江百里遙月射珠宮紛變怪

風生瓊壑奏鈞韶離家因為官期迫久客懸知物累消
明日嚴陵灘下過漢廷節義仰雲霄

二十六日過黃山巡檢司批引晚泊洞廬

二十七日早自七里灣起程問嚴陵則已過矣悵
然久之作上灘歌一首是日午過嚴州晚宿鄉頭

碧水清清深見底白石團團露牙齒輕帆一幅掛長風
恍惚人行明鏡中篙工睥睨怕船破努力撐向山灣過
夜來竟上嚴陵灘灘前古木明月寒人生古來重高節

慨我猶能想餘烈夢中如復見音容獨鶴不來江水空
起來謾聽舟人語試問前灘渺何許雲臺何似釣臺高
吁嗟此士真英豪天地茫茫重回首蝸角蠅頭競奔走
浩歌下瞰長波流不盡人間今古愁囊中百錢問沽酒
醉筆縱橫落星斗沙頭兒女笑相看塵土可憐行路難
二十八日過蘭谿縣晚宿源潭

二十九日過龍游縣晚宿野狐壑

輕帆雙幅挂長風碧水光寒一鏡空疊嶂青霞來縹渺

太虛元氣浥空濛
淮天城郭神遊外
海國林泉夢寐中
五十年來長作客
放歌欲效杜陵翁

十一月初一日甲子冬至行龍游界中上灘為衢
州界晚宿衢城下

上灘歌

白石鑿鑿流水聲
大山小山遙送青
寒天日短間無酒
何似三閭恨獨醒

年年至日淮水涯
今日三衢又憶家
漫道人生如夢寐

誰知歲月換龍蛇

霜鴈叫雲愁遠天淺水沙灣人放船灘頭玉石作碁子
好寄爛柯山上仙

水上明燈點點紅夜寒直欲破魚龍浮屠法教真兒戲
苦海誰云濟度功

鷗鷺捕魚魚滿船朝來沽酒要烹鮮撐近灘頭笑相問
恰有青銅數百錢

灘水潺潺日夜流嚴陵過了又衢州山人赤脚岸頭立

蠻語蠻言相喚酬

上灘下灘復上灘
重水重山罨畫間
西江早得仙舟便
上清宮闕許躋攀

水輪聲轉似游龍
草屋無人碓自舂
蓬戶暫開聞語笑
分明機巧見神功

片帆遙指大江西
回首千巖落照低
久客天涯筋力倦
祇消歸老故山棲

吳頭楚尾路悠悠
水宿風餐可自由
故園暫到仍輕別

辜負小山叢桂秋

初二日過石塘橋晚至常山埠頭

初三日早入迎薰門至常山縣學附徐景顏書見
教官徐允明先生訓導江仲允先生徐某先生教
諭割雞為黍及見前鄞縣尹陳可齋先生送出通
遠門外行三十里至白頭石鋪徐氏店宿歇

初四日自白石起程午後至玉山造縣學見程訓
導允明先生過夏氏留飲就宿學中夏氏係英公

之後

初五日玉山知縣徐懋和招早飲回縣學中題畫
三幅贈徐知縣張縣丞及程訓導又題菖蒲畫贈山
陰胡則方

古木畫三首

山中古木倚巖崖漫說風霜老不禁過眼繁華渾似夢
憑誰同守歲寒心

長松千尺是誰栽頻聽鸞笙谷口來幸遇明時終大用

風霜莫老棟梁材

碧雲雙樹倚差栽
百歲山中柰老何
恐化蛟龍上天去
莫教風雨夜來多

題菖蒲

山人本愛北山居
種得仙家九節蒲
服食可應資壽考
便須騎鶴上清都

初六日早登舟晚至沙溪鎮夜泊

初七日飯後至廣信東城訓導傅先生原綱周先

生宗文上饒縣學教諭徐先生仲告訓導游先生
用文歐陽先生君謨諸生十餘人遠送至學見府
太守王公同知方公而退

初八日徐觀道先生及諸公見訪

初九日上任望闕五拜禮先聖殿四拜禮諸生以
序見縣學徐先生倉使饒某等以酒果相賀府太
守同知亦以禮來就請宴席諸生割羊豕為饌在
座者徐觀道先生教諭府縣學訓導先生四人云

題菖蒲四首

九節長幽妍從來石水便簡編燈火夜煩爾為收烟
石上發幽馨仙蒲九節青山翁資服食百歲紀修齡
蒼石種仙蒲分明認虎鬚太陽方卓午點點露成珠
清波葢淺沙劒節長靈芽百歲蓬萊客青春早見花

題古柏圖

古木與雲齊亭亭舞翠旗莫令霜雪重老却鳳凰枝

題枯木圖

霜雪若為容蕭蕭澗壑中美材終大用披拂待春風

題枯木竹石

晚過碧山阿蕭蕭竹樹多隱君泉石意霜雪果如何

題枯木

南來為客過常山古木蕭蕭巖谷間早晚明堂要梁棟
冰霜何事苦摧殘

題古木圖

偃蹇老龍形靈根長茯苓蕭然巖谷底霜雪飽曾經

冰雪歲寒心蕭蕭澗谷陰却憐風月夜來聽鳳凰吟

題菖蒲圖贈上清吳道紀

上清巖谷列仙家靈草春深長翠芽
解使身輕如羽翼飄飄萬里御雲霞

枯木竹石贈祥符寺主古芳禪師

蒼石玉玲瓏蕭森竹樹叢老禪初定起林杪一龕風

又

蒼龍蟠澗壑翠羽出林棲為喚瀟湘客來尋石上題

菖蒲圖

九節蒼龍脊
葱龍石上青
輕身資服食
飛步上空冥

題枯木

澗谷碧雲深
貞哉百歲心
多憐風雨夜
翻作老龍吟

題畫松寄弋陽林敬伯主簿

山中古木倚雲高
縹緲天風滾翠濤
花縣重逢鯨島客

祇須剪葉釀春醪

又題古木五首

生來不得大夫封老矣寧甘澗壑中物外繁華休着眼
任教桃李笑春風

山中偃蹇似游龍夜半聲寒萬壑風祇恐春來成變化
滂沱雷雨暗浮空

大材不用復誰憐老矣孤根托九泉獨有女蘿相倚附
誓同冰雪過年年

閱盡冰霜老不知棟梁久矣負前期吹噓尚待春風到
谷口來聽叫子規


偃蹇寧為世所憐
冰霜巖壑不知年
古來材大難為用
休問榮枯雨露偏

題竹

翠竹傍林低
毋煩枳棘迷
盛時昭美貺
須待鳳來棲

枯木竹石

石林斜透玉玲瓏
萬代秋高古木風
帝子不來愁日暮
飄飄遺佩響浮空



榮陽外史集卷一百